

MATEO JESUCRISTO ENIRUEMO ILLA RAFUE CUIAFUE

Jesucristo ie usumatiai
(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías

mīcorī jītodi Jotam. Jotam mīcorī jītodi Acaz. Acaz mīcorī jītodi Ezequías mīcorī. ¹⁰ Ezequías mīcorī jītodi Manasés. Manasés mīcorī jītodi Amón. Amón mīcorī jītodi Josías. ¹¹ Josías mīcorī jītodi Jeconías mīcorī. Jeconías mīcorī amatiai mīcorīai jīai itimaci. Naie facaiseconi Babilonia railla nairai dīne naie nairai soldaduai cai comīnina uitimaci. ¹² Naie meinomo Jeconías mīcorī Salatīel mīcorīna comuitate. Salatīel mīcorī jītodi Zorobabel mīcorī. ¹³ Zorobabel mīcorī jītodi Abiud mīcorī. Abiud mīcorī jītodi Eliaquim mīcorī. Eliaquim mīcorī jītodi Azor mīcorī. ¹⁴ Azor mīcorī jītodi Sadoc mīcorī. Sadoc mīcorī jītodi Aquim mīcorī. Aquim mīcorī jītodi Eliud mīcorī. ¹⁵ Eliud mīcorī jītodi Eleazar mīcorī. Eleazar mīcorī jītodi Matán. Matán mīcorī jītodi Jacob mīcorī. ¹⁶ Jacob mīcorī jītodi José mīcorī. José mīcorīdi María ini. Naiñaiñodi Jesús ei. Naimie mameci jīacīdi Cristo.

¹⁷ Abraham mīcorī illa facaise mona David mīcorī jeicia facaisemo Jesús ie catorce nanoramaci mameci jai ite. David mīcorī facaise mona Babiloniamō ite nairai anamo cai jaiagai illa facaisemo catorce nanoramaci mameci jīai ite. Babiloniamō ite nairai anamo cai jaiagai illa facaise mona Jesús jeicia facaisemo catorce nanoramaci mameci jīai ite.

Jesús jeicia rafue

(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñona jīcanotimīedi José mīcorī. Naimie mīcorī dīga naiñaiño nīa iñenia, Jesīnamui Joreño ie uaido naiñaiñona uruesitate. ¹⁹ José mīcorī maremie. María jai uruesillana naimie

mīcori fidianona, naiñaiñona meidaitañellena jira, naiñaiñona bainino dotaacade. Jiaimie diga illa-mona urueside raillanona comecina facajanona, naiñaiñona dotaacade. ²⁰ Naimie mīcori comecina iemo facaia, naimie mīcori nicairillanona, naimie mīcorimo Jusiñamui jaienici bairiano raite:

—José, David mīcori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate. ²¹ Himana jocoite. Ie comini naimaci jeacinomona naimie jilloitajaibilla jira, Jesúna o jitalle naimie mamecidi —raite. ²² Bie rafue suide, Jusiñamuidi ie lloraima mīcori jaiie llotataga uaina suillena. ²³ Jaiie llotatate:

Himana uiñoñediñaiñomo comuite uruedi.
Himana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

²⁴ José mīcori casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie mīcori nia iniñede. Naiñaiño jito jeicia mei, José mīcori jitade naimie mamecina Jesúna.

2

Monamo ite ramo comeciaina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes mīcori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judíuaí illaimadi? Jitoma bisoillafomo como bairede ucuduna cidicaí. Naiemona naimie jeiciana jai uiñoticaí. Naimiemo iobillacinona fecallena biticaí.

³ Herodes micoridi naicinona cacajanona, ie começi jarire ite. Jiamie naimie meifomo illana jitañede. Jerusalémo itinodi jiaí jarire itimaci.

⁴ Ie facaise Herodes micorí judíuaí illaicomínina uaiduanona, naimacimo Cristo raillamie jeiciana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micoridi jaie cuega:

⁶ Judea eniruemo Belén nairai ite; ia naie nairai eo janorede.

Naie nairaímona damie jeiciamona, omoi illaimana jaite.

Naimiedi cue Israel railla comínina sedaite.

Iemona Belén nairai Judea illaicomíni baifemo faite

cuega. ⁷ Iena cacaja mei, Herodes micoridi monamo ite ramo comeciaí facauidino bainino uaidote. Naie ucudu bairia facaise raise uiñollena jicanote. ⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiaí feaacadicue —llote.

—Jii —fairiotimaci. ⁹⁻¹⁰ Iena naimie micorí llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, cidimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro

fecadimaci. Caimare sorirede rana jiai fecadimaci.
¹² Naimaci inia anamo naimaci nicairillanona,
 Jusiñamui llote:

—Herodes dine abido jaiñeno —llote. Ie jira
 Jerusalémo jaiñeno abido naimaci eniruemo
 jaidimaci.

Egiptomo Jesús jailla rafue

¹³ Naimaci jailla mei, José micori inia anamo
 nicairite. Nicairillanona, Jusiñamui jaienicidi
 naimiemo bairiano raite:

—Egiptomo nai o urue diga, ie ei diga, mai jai.
 Omo cue llua dinori nainomo i. O abido billirui
 lloiticue. Herodedi nai uruena jenoite, naimiena
 meinellena —raite.

¹⁴ José micori raire casillano, nai urue diga, Jesús
 ei diga, Egiptomo naiona jaide. ¹⁵ Herodes micori
 fiodable dinori nainomo ite. Ie muidona Jusiñamui
 ie facaina lloraima micori llotataga uai jai suide.
 Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori
 fidiñede. Monamo ite ramo comeciaina facauidino
 naimaci eniruemo abido jaillana naimie micori
 jiai fidiñede. Naimie micori dine naimaci abido
 biñena jira, naimie micorina naimaci jifua jira,
 naimie micori eo icirite. Ie jira mena años itisaiai
 dierisedena faetate. Nana Belémo ite itisaiai diese
 faetate. Belén ecimo itino uruiaina jiai faetate.
 Naie ucudu mena años jaie nano bairena jira,
 mena años itisaiai dierisedena faetate. ¹⁷ Raquel
 micori jaie eia isoi, Belén itino birui eedimaci.
 Jeremías micori iena jaie cueda:

18 Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori uruiaí micoriaí facaina eede.

Jiaie cominimona firaduacinona jitaiñede, naiñaiño uruiaí micoriaí jai fiodailla jira.

19 Digarui illanona, Herodes micori fiodailla mei, Egiptomo José micori dane nicairillanona, Jusiñamui jaienici naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraini micoriaí jaie ciegafuiaí jai suide. Cristona jaie cuetimaci: “Naimiedi Nazaret imie”.

3

*Jofue iñenanomo Juan Bautista micori illa rafue
(Mr 1.1-8; Lc 3.1-9, 15-17; Jn 1.19-28)*

¹ Diga años illanona, Juan Bautista raillamie micoridi jofue iñenanomo illanona, cominina dafaifia, Jusiñamui rafuena naimacina llofueuide.

² Comini naimie micori dine billanona, naimacimo llote:

—Omoi jeacinona fainonocaida, omoi comeciaí iuailai meido. Jusiñamui dibeimo omoi i. Naimie

anamo omoi illana naimie jitailla jira, omoimo iena lloiticue —llote. ³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. ⁴ Juan micoridi camello itirai ai ie nilla iniroina jitade. Igoi iena ie moilligaina jitade. Fioduaina rite. Cifona mete. Jamai rana guite. ⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fueмона jai jaisoidimaci. ⁶ Jusiñamuimo naimaci jeacinona naimaci llua meino, naimacidi Juan micori bautizaga. ⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isidomoi. ¿Ñiese Jusiñamui riicaillifueмона jilloitomoi? Cue dine omoi billena, ¿bu omoimo llua? ⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifueмона jilloiticaí”. Ero, omoimo lloiticue: Cue llua isoi omoi finoñenia, naimie riicaillifueмона

jilloñeitomoi. Abraham micorì uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micorì facaina uruiaina comuitarede. ¹⁰ Ero, llisiñede riarra tiedomoi. Tiia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie riicaillafue anamo jai itomoi. Omoi comeciai iuai omoi meidoñena, omoina duere finoite. ¹¹ Jusiñamui dibeimo omoi comeciai iuai omoi meidoia, jinui diga omoina bautizaiticue. Cue bai femo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñena, omoina duere finoite. ¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue
(Mr 1.9-11; Lc 3.21-22)

¹³ Juan micorì Jordán dine nia ia, Galileamona Jesús bite. Naimiena bautizallena, Juan micorì dine bite. ¹⁴ Juan dinena naimiemo llote:

—Bautizallena cuemo bitio; ia dama ite. Cuenao bautizaia, cuemona mare.

¹⁵ Jesús uai ote:

—Cuená mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode. ¹⁷ Ie facaise mona-mona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taife ramo faia rafue

(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta digarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomeniconá jaita”.

⁴ Jesús uai ote:

—Dama ite. O lluaña finoñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofu muidomo Taife Jesúna uite. ⁶ Raite:

—Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci cueda. Naie lloga uai suillena, bie jofomuidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cueda: “Cai Nama Jusiñamuina facaciñeno”. Naimie cuena raise eenuana jai uiñotitue. Jamai ebena naimiena facaciñeiticue. O lluana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaide. ⁹ Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iititue. O caiñici ifodo ana rainada, cuemo iobillacino o fellena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cueda: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. ¹¹ —Ie facaise naimiemon Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite. ¹⁴ Nainomo Jesús jailla jira,

Isaías micorí jaie ciegafuiaí jai suide. ¹⁵ Naimie micorí naie cominina jaie ciega:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiaí ite. Nainomo judíuainedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñoena jira, naimacina iese ciega. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide. Llofuate:

—Jusiñamui díbeimo illena, omoi jeacinona fainonocaida, omoi comeciái iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaam-agamiëna fetua rafue

(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiëna ciode. Naga ie ama iaímaiaí. Damie Simón. Jiaici naimie mamecidi Pedro. Ie ama Andrés diga ite. Lloijina fairaíma iaímaiaí. Iese jaca naie iaímaiaídi maijuidiaímaiaí. ¹⁹ Iaimaiaímo llote:

—Cue diga omíco jaiocaillena, cue diga mai bi. Cue llofueganona omíco jaillena jitaídícue.

Lliciaina birui ocabitomico; iadedi cominina oitomico, cue dibeimo naimaci illena.

²⁰ Iena cacajanona, ieconi iaïmaiaï lloijina faïnonocaida, naimie diga jaidiaïmaiaï. Ie llofueganona jaïllena, jaidiaïmaiaï. ²¹ Lliaï bai Jesús jaidemo, jiaïe menamiena ciode. Naga ie ama iaïmaiaï. Damie Jacobo. Jiaïmie Juan Iaïmaiaï moodi Zebedeo. Naimie diga botemo itiaïmaiaï. Lloijina sigaidimaci. Jesús iaïmaiaïna uaidote, naimie llofueganona jaïllena. ²² Ieconi iaïmaiaï moonna faïnonocaida, botemona ari billanona, Jesús diga jaidiaïmaiaï.

*Jesús ailluena cominina llofua rafue
(Lc 6.17-19)*

²³ Nana Galileamo Jesús jaide. Judíuaï ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciaï iuaina meiduana llofujete. Ie cominina naimaci illena llofujete. Naga isoide duiconna duidinona jillotate. ²⁴ Iemona nana Siria railla eniruemo naimie mameci soride. Naie comini naga isoide duiconna duidinona naimie dine atidimaci. Abi isiredinona atidimaci. Jananiaï anamo illa cominina atidimaci. Naïllidinona atidimaci. Niraïdanidinona atidimaci. Nana naimacina jillotate. ²⁵ Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

5

*Anedumo naimie ia, Jesús lloga rafue
(Lc 6.20-23)*

1-2 Ailluena cominina Jesúna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote:

—Omoina Jusiñamui ie cominina sedaacana rafuena ja llofueitícue. Naimie anamo naimaci illena llofueitícue. ³ Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona daní finonidícaí; ia naimie caina canuanona, iena finoitícaí”. Naimie cominina naie isoidino illamona, naimie naimacina canoite. Iemona caimare iitimaci. ⁴ Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iemona caimare iitimaci. ⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina íco cue sedaia, iese iite. Iemona caimare iitimaci. ⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. ⁷ Jusiñamui cominina duenaitinona sedaite. Naimacina naimie duenailamona, Jusiñamui naimacina íco duere finoñeite. Iemona caimare iitimaci. ⁸ Jusiñamui jeanide começiredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mameçirenitimaci. Iemona caimare iitimaci.

10 Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaiatimaci. Iemona caimare iitimaci. 11 Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreña tainona lloitimaci. Duere sefuitomoi; iadedi Jusiñamui omoina caimare itataite. 12 Omoi isoi omoi jaiagamona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai.

Jesús comini illa rafue

(Mr 9.50; Lc 14.34-35)

13 Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jaie comini maraiñede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

14 'Cuemo omoi duilla jira, jaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairede. Ie illanona jaca uiñoticaí. Jusiñamui jitailla isoi omoi illamona, jaie comini naimiena uiñoitimaci.

15 Lamparín unia mei, cirigai anamo buna rainañega. Jaca ie rainarafomo rainaca, nana

jofu jeraina lligaiñollena. ¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñotimaci. Iemona: “Jusiñamui maremiena” raitimaci.

Jesúdi Moisés micorina llofuia rafue

¹⁷ Jesús llote:

—Jusiñamui ie cominina sedaacalle rafue nia llofueitícue. Iena cue llofuia jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaie llogacinuai maraiñede” jiai raiñedicue; iadedi omoina naie llogacinaina raise uiñotaacadícue. ¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamací raitimaci: “Dajerie llogacino jiaie llogacino baifemo faite”. Cue raitícue: Naga llogacino omoi inoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judíuai illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñotimaci; iadedi naimaci comeciai Jusiñamui díbeimo iñedimaci.

Jesúdi iciriñena llofuia rafue

(Lc 12.57-59)

²¹ Jesús llote:

—Omoi llofueraimomona bie jai cacadomoi. Moisés micori omoi jaiagaimo llote: “Comena meineño. Comena bu meineia, jeacino jai

finode. Naimie fiodaillena juez llua”. 22 Naie llogacínodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

23-24 'Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

25 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaita. 26 Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

Jesúdi iima ie aiñede riño diga illa llua rafue

27 Jesús llote:

—Omoi llofuerañimona bie jai cacadomoi. Moisés micorí jaie llote: “Omoi aiñede riñoñiaia diga iño. Omoi iniñede iñiaia diga iño”. “Iena bu finoia, jeacino jai finode” raitomoi. 28 Jiaie rafue birui lloiticue. Ie aiñede riño eruaillamona naiñaiño bu nicidoia, naiñaiño diga jamai iníacananona naimie começi facajamona, jeacino jai finode. Naiñaiño diga iñede; ia naiñaiño diga jamai iníacananona naimie começi facajamona,

jeacino jai finode. ²⁹⁻³⁰ Biena ñaiticue. Nie isoide rafue omoina jeacino finotaia, iemo eruaiñeno. Iena linoñeno. Iemo comecina facañeno. Omoi ciua rana jira, omoi jitaillamona jeacino finodomoí. Rana omoi jetaja jira, omoi jitaillamona jeacino finodomoí. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoí. Nana omoi abi diga iraimo jaitomoí. Iraimo omoi jaiñellena, jeacino finoñeno.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerañimona bie jai cacadomoí. Moisés micori jaie llote: “Ie aina bu dotaacania, naiñaiño dotajacanabena fecaja”. Iedo jai jaicabidomoí. Iena bu finoia, omoimona mare.

³² Jaie rafue birui lloiticue. Jiaimie diga naiñaiño iñenia, ie aina bu dotajia, marañede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotañeno.

Jesúdi Jusiñamui mameci jamai ebena linoñenana llua rafue

³³⁻³⁵ Jesús llote:

—Omoi llofuerañimona bie jai cacadomoí. Moisés micori omoi jaiagaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoí. Omoi lloga uai omoi

finollena jiaie comini uinollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoi mona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jiai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoi. ³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jiai llinoñeno. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jiai llinotomoi. ³⁷ Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca llono. Uanaicinona omoi lloñenia, Taifemona omoi uaina otomoi.

*Jesúdi ìba oñenana llofua rafue**(Lc 6.29-30)*³⁸ Jesús llote:

—Omoì llofuerainimona bie jai cacadomoi. Moisés micorì jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹ iadedi birui omoimo lloticue: Ìbana oñeno. Maraiñede rafue finodimimona omoì abina ridoñeno. Omoì cacaina naimie dutaia, naimie diga iciriñeno. Enefebeimo omoì uieco dobaiño, enefebei omoina naimie dutallesa. Naimie omoina duere finoia, ìbana oñeno. ⁴⁰ Omoì iniroi bairollena omoina bu llogidoia, juez nia omoimo lloñenia, naimie jitailla iniroi baiñemo naimiemo feca. ⁴¹ Daje kilómetro naimaci raruaia omoina uillana illaicomini ocuia, iena uiño. Nibaì omoì comeci jitaiñede; ia naimacina canollena, iena mena kilómetros uiño. Naimaci ocuilla baiñemo uiño. ⁴² Omoimo ite rana bu jicaia, iena caidiñeno. Omoì rana bu jamai jicuano uia, abido atillena, iena caidiñeno feca.

*Jesúdi omoina gaiñenano isiruillena llua rafue**(Lc 6.27-28, 32-36)*⁴³ Jesús llote:

—Omoì llofuerainimona bie jai cacadomoi. Llotimaci: “Omoì cominina isirui; iadedi omoì nairaiñedinona enoi”. Iedo jai jaicabidomoi. ⁴⁴ Omoimo birui lloticue: Omoì nairaiñedinona isirui. Omoì gaiñenanona isirui. Omoina duere finodino facaina Jusiñamuimo jii. Naimaci comeciaì iuai meiduana naimiemo jicano.

⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate.

⁴⁶ Naimie comini omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baiñemo faiñedomoi. Naimaci isoi itomoi.

⁴⁷ Dani omoi cominina omoi uaidoia, mare; ia omoina gaiñenanona omoi uaidoñenia, naimaci baiñemo faiñedomoi. Jusiñamuina inoñedino baiñemo faiñedomoi. Naimaci isoi itomoi. ⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoina nia llofueiticue. Jiaie comini iena cioillena, mare rafuena omoi finoiadedi, omoina: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana

marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñoeno. ⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoina: “Mare” raite.

Jesús Jusiñamuimo jia rafue

(Lc 11.2-4)

⁵ Jesús llote:

—Jusiñamuimo omoi jia, maredinona abi caitadino isoi omoi iñeno. Ofiracomo naimacina comini cioillena, marefodo jidimaci. Jicabilla facaiseconi naisomo naimaci ia, naimacina comini cioillena, marefodo jia jidimaci. Naimacina: “Jusiñamuina eo sedadimaci” comini raillana jitaidimaci. Cominimona iobillacinona birui jai feiñotimaci. ⁶ Omoi jiacania, omoi jofomo fo jai. Nainomo Jusiñamuimo anado omoi jia. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jia, naimiena inoñedino isoi jamaicinona ñañeno. Naimaci comecina facadimaci: “Daje jiracinona diga icaiño cai jia jira, ja muidomo cai Moo caina raise cacaita”. ⁸ Naimaci isoi iñeno. Nia omoi jicañenia, naimie omoi jitaille rafuena uiñote. ⁹ Naimiemo omoi jiacania, iese jia:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

11 Nagarui guille caimo itata.

12 Caina jeare jiaïno finoia, iena caimona feilla isoi, cai jeacinona omona feilla jira, cai jeacinona oni dota.

13 Caimo ramo bu faia, caina cano, iena cai ñnoi raillano. Jeacinona finuamona caina jillota. Iese omoi jii. 14 Omoïna jiaïe comini jeare finoia, iena omoi feitaia, omoi monamo ite Moo omoi jeacinona iena feitajanona, jiaï oni dotaite; 15 iadedi jiaïe comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

16 Jesús llote:

—Omoïna nia llofueiticue. Raitomoi: “Jusiñamuina eo raise cai sedajanona, birui cai guiñeiticaï. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ïco iena feiñoñeitimaci. 17 Ero, naimaci isoi omoi iñeno; iadedi omoi guiñenarui ia, omoi abiaï raise fino. 18 Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

*Jesúdi Jusiñamuimo comecina facaja rafue
(Lc 12.33-34)*

19 Jesús llote:

—Omoi jofomo ailluena rana eenocana uiñeno. Gĩreco iena guicabite. Dajerie ra nemuide. Omoi jofomona jiaie comini iena fiicadimaci. Ailluena ra eenuamo omoi comeciaina facañeno; 20 iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Gĩrecuai mona, nemuillamona, firirainimona, iena nainomo faifiñeitomoi. 21 Aillue ra omoi moia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

Jesús cai comecina llua rafue

(Lc 11.34-36)

22-23 Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

Jesús raruiaina llua rafue

(Lc 16.13)

24 Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise finoite. Ie isoide. Raruiai ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue

(Lc 12.22-31)

25 Jesús llote:

—Jusiñamui jitaillacinomo omoi começina facaia, omoi illamo omoi começina jarire facañeitomoi. Bue omoi guillemo jarire começina facañeno. Omoi jitalle iniroimo jarire começina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. ²⁶ Silliñiaimo começina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimaçina sedajamona, naimaci guille ite. Naimaci baifemo omoi faia jira, naimie omoina canoite. ²⁷ Omoimona, ¿bu ie comeci jarire facajamona a sairite? Iese jaca buna a sairine. Dama Jusiñamui omoina a sairitarede. ²⁸ ¿Bue ñellena iniroimo jarire começina facadomoi? Safiamo omoi começina faca. ¿Niese sicodimaci? Maiñedimaci. Iniroina tiforiñedimaci; ²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoi uailla jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno. ³¹ Omoi comeci jarire finoñeno. “¿Buena guiticaí? ¿Buena jitaíticaí?” rañeno. Iemo começina eo facañeno. ³² Jusinamuina ñnoñedino iemo começina facacabidimaci. Nana omoi jitaillacinona omoi Moodi uiñua jira, naimaci isoi iñeno. ³³ Jusiñamui anamo raise omoi i. Naimie jitaillacinona finocana omoi jai. Naimiemo omoi

comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite. ³⁴ Jusiñamui omoi birui jitailla ra omoimo iite. Iena uiñuamona, jiairuido suille rafuemo jarire comecina facañeno. Ico omoi jitailla ra omoimo jiai iite.

7

*Jesúdi jiaie cominina mameriñenana llua rafue
(Lc 6.37-38, 41-42)*

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite. ² Jiaie cominina omoi mamerilla diese Jusiñamui omoína duere finoite. ³ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. ⁴ Omoimo maraiñedicino illamona, ¿niese omoi ecimo itimiema mameritomoi? ⁵ Omoimo ite maraiñedicinomo omoi comecina fa-caacaiñena jira, maredinona abi caitadinomoi. Omoi comeциаina nano raise fino. Iemei omoi ecimo itimiema canorenitomoi. Naimie comecina raise canorenitomoi.

⁶ 'Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiaí omoína ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno.

Naimacimo omoï llocabia, omoïna duere finoitimaci. Omoï rafuena jamaitimaci.

Jesúdi cai jitailla ra jicaja llua rafue

(Lc 6.31; 11.9-13)

⁷⁻⁸ Jesús llote:

—Daje ra omoï faifia, iena jenodomoï. Raise jenoia, iena baitomoï. Damiena omoï jenoia, naimie illanomo jaidomoï. Nainomo naimiena baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite. ⁹ Ero, omoïmona naimiemo llomenicono ie moomo ie jito jicaia, noficina fecañede. ¹⁰ Lliciaina jicaia, jaiona fecañede. ¹¹ Jeacinona finocabidomoï; iadedi mare ra omoï uruiaimo fecacabillana uinotomoï. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotonomo mare rana fecaite.

¹² 'Jusiñamui jitaillacinona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna maraiñoeno finuana omoï jitaia, naimacina ie isoi maraiñoeno fino. Moisés micori ie isoidicinona jaie llofuate. Jusiñamui facaina lloraini micoriai ie isoidicinona jaie jiai llofuetimaci.

Jesúdi Jusiñamui dine rille llua rafue

(Lc 13.24)

¹³⁻¹⁴ Jesús llote:

—Jusiñamui dine omoï rillena, janorede naisodo omoï jailla isoi isoilla. Naisomo ite nasedi janorede isoide. Naimie dine naie rilla jira,

naiedo omoï jai. Nainomo jaidino jaca iitimaci. Naimie dine rillena eo sefuiarena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoï raise jaiñellena, omoina jifueiacadimaci. Naimaci llofuiacínodo omoï jaia, Jusiñamui rafuedo raise jaiñeitomoi. ¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaimona uvas railla riarra oñega. Eecuaimona higos railla riarra jiai oñega. ¹⁷ Mare riarmona mare llisilla comuide. Maraiñede riarmona maraiñede llisilla comuide. ¹⁸ Mare riarmona maraiñede llisilla comuiñede. Maraiñede riarmona mare llisilla comuiñede. ¹⁹ Mare llisilla comuitañena jira, naga maraiñede riarra jaitaca, iena jobaillena. ²⁰ Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusinamui naimacina duere finoite.

Jesúdi ie Moo ie comini sedajanomo ille llua rafue
(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusíñamui ie cominina sedajanomo ñeite; iadedi dama cue Moo jitaille rafue finodimiedi nainomo iite. ²² Cominimo juez isoi Jusíñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci. ²³ Uai oiticue: “Omoina uiñoñedicue. Cue comiñedomoi. Jeacino omoi comecimo nia illa jira, cuemona oni omoi jai. Cue Moo ie comini sedajanomo jaca ñeitomoi”.

*Jesúdi naimiena ñnuana ñaia rafue
(Lc 6.47-49; Mr 1.22)*

²⁴ Jesús llote:

—Cue lluaana cacadomoi; iadedi omoimona nana ñnoñedomoi. Cue lluaana ñnotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofa raise finua jira, jofa goiñede. Iena faifiñede. Ie isoide. Cue lluaana ñnotimie faifiñeite. ²⁶ Cue lluaana ñnoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raiñede. ²⁷ Noci deidemo, eo jinuidemo, jofomo ille toia, aifi bitemo, jofa goillamona, jai eo judaisite. Iena faifide. Ie isoide. Cue lluaana ñnoñedimie faifite —llote.

²⁸⁻²⁹ Moisés micori rafue uiñoraini isoi naimie llofueñena jira, illaimamo ite uai itimie isoi naimie

llofuia jira, nainomo ite cominidi naimie lluari
raijicaidimaci.

8

Jesúdi efonaitimiena jillotaja rafue (Mr 1.40-45; Lc 5.12-16)

¹ Naimie llofuia mei, anedumona Jesús ie llo-
fueoicaigano diga ana bite. Ailluena comini
naimiena racadimaci. ² Efonaitimie naimie dine
billanona, naimiena raise uaiduamona, caiñici
ifodo ana rainadate. Raite:

—Maestro, o jitaiededi, cuena jillotaredio.

³ Jesús ie onolli naimiemo oni ñuitajanona,
naimiena jetade. Raite:

—Ona jillotaiacadicue. Mai o jillo. —Ieconi
naimie jillode. ⁴ Jesús naimiemo llote:

—O jilluana bummo lloño; iadedi Jerusalémo,
Jusiñamui jofomo, Jusiñamui diga ñairaima
dine mai jai. O jilluana comini raise uiñollena,
naimiemo o abina acatajai. Moisés micori jaie
lloga rana Jusiñamuimo feca. —Iemei Jesús oni
jaide.

Jesúdi capitán mullaimana jillotaja rafue (Lc 7.1-10)

⁵ Capernaum railla nairaimo Jesús ria, capitán
raillamie naimie dine bite. Naie capitán Roma
railla nairai imie. Judíuñedimie. Billanona, duere
llote:

⁶ —Maestro, cuena cano. Cue jofomo cue
mullaima ite. Ie abina niraídanide. Naimie abi eo
isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitalena.

⁸ Naie capitán dane llote:

—Jaiñeno. Jamai bue isoidicue. Iemo, ¿niese cue jofomo biitio? O uaido bene lluanona cue mullaïma jilloite. ⁹ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaïma illa jira, naimiedi cue uaina ñnote. O anamo naie duico illa jira, o uaina o lloia, cue mullaïma jilloite.

¹⁰ Iena cacajanona, Jesús rajicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina ñnoitimaci. Naga nairaiaimona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. ¹² Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena omoi ñnoñena jira, omoïna oni dotaite. Dotaja mei, eo duere sefuillamona eetitomi.

¹³ Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconi naimie mullaïma jillode.

*Jesús Pedro jifaiñona jillotaja rafue
(Mr 1.29-31; Lc 4.38-39)*

14 Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride.
 15 Naiñaiño dine jaillanona, naiñaiñona jetade. Jetajamona ieconi naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue
 (Mr 1.32-34; Lc 4.40-41)*

16 Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. 17 Naimacina Jesús jillotajamona, Isaías micori jaie ciegafuiaie iese jai suide. Naimie micori jaie cueba: “Caina jilloitajanona, cai duiconona oni oretate”.

*Jesús ie llofuegamiena damie jaillana ie rafue
 (Lc 9.57-62)*

18 Ailluena comini naimie ecimo illana Jesús cuanona, ie llofueoicaiganomo ruica dine jaillana llote. 19 Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacadie. O llofuegamiena jaiacadie.

20 Jesús uai ote:

—Janorede ocainaiadi joforedimaci. Silliniiai jillainiaredimaci; iadedi jofonidie. Monamona billanona, imana jaidie; iadedi buenidie. Jofonidie. Cue diga o jaiacania, bue isoidena cuemona oñeitio. Iemo o comecina raise faca.

21 Ie facaise jaiie llofuegamie Jesúsno llote:

—O diga jaitie; ia cue moo nia fioidiñena jira, o diga nia jaiñeitie.

22 Jesús naimie uai ote:

—Cue diga idai mai bi. Cuen a ñnoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Cue diga mai bi.

*Jesúdi joraina ll#caitaja rafue
(Mr 4.35-41; Lc 8.22-25)*

²³ Naie llofuegamie diga Jesús ñaia mei, ruica ñine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, ²⁵ jaciruillamona, Jesúna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuen a raise ñnoñedomoi. Jacinaiñeno.

Iemei Jesús naidacaillano, aifina lletade. Joraina jiai ll#caitade. Ieconí ll#caide. Bagoñede.

²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

Bai jaillanona, ruica ñine ridimaci.

*Jesúdi Gadara railla eniruemo illa rafue
(Mr 5.1-20; Lc 8.26-39)*

²⁸ Ruica ñine naimaci ridemo, Gadara railla eniruemo sijidimaci. Ieconí menamie Jesús ñine bitiaimaiai. Jananiai anamo ite iaimaiai. Comini raoillanomo nofie moto ifuaimona bitiaimaiai. Nai iaimaiai eo riirena jira, jaca bu nainomo

jainide. ²⁹ Jesúna iaímaiaí cúa facaise jananiaí iaímaiaína cuirioitate:

—Jusiñamui Jitodio. ¿Niese cocona nibaíacadio? Coco duere sefuille facaise nia iñede; iadedí birui cocona duere finuaíbidio —cuirioidiaímaiaí.

³⁰ Naie bai iaíre ailluena chanchuai guillano itimaci. ³¹ Jananiaí Jesúmo duere llotimaci:

—Oni caina o oretajanona, chanchuai abímo caina oreta.

³² Jesús uai ote:

—Mai jai.

Ieconí nai iaímaiaímona jananiaí oni jaillanona, chanchuai abímo jaide. Iemona iconiaído chanchuai joraimo aisícana jaillanona, corobaiside.

³³ Iena cíanona, chanchuai sedaraíni imaci nairai díne aisícana jaidimaci. Nana naie rafuena llotimaci. Jaive jananiaí anamo illa iaímaiaí rafuena llotimaci. ³⁴ Ie jira ailluena comíni Jesús díne bitimaci. Naimiēna cúanono, naimiēmo duere llotimaci, naimaci illanomona naimiē jaillena. Naimaci jitailla jira, Jesús oni jaide.

9

Jesús tísitaitimiēna jillotaja rafue (Mr 2.1-12; Lc 5.17-26)

¹ Botemo ie llofueoicaigano díga Jesús jaillano, ruica díne abído jaide. Capernaumo ie illanomo ride. ² Nainomo rilla mei, naimiē díne comíni ie bíramo bíide tísitaitimiēna atide. Naimiēna atidinodi Jesús naimiēna jillotajana ñnote. Iena Jesús uiñuanona, tísitaitimiēmo llote:

—Moo, o começina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús lluana naimaci cacajano, Moisés micori llogacinona llofueraini começina facadimaci: “Dama Jusiñamui jeacinona dotarede. Bimie Jusiñamuñede; ia Jusiñamui ifomo iacade. Jusiñamuina jai jeare ñaite”. ⁴ Naimaci começiaina facajacinona Jesús uiñuamona, Jesús dinena jicanote:

—¿Bue ñellena omoi começina jeare facadomoi? ⁵ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ⁶ Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie lloiticue: “Mai naidacai. O biira ferianona, o jofomo mai jai”.

⁷ Iese naimie raillamona, tisitaitimie jillode. Naidacaida, ie jofomo jaide. ⁸ Comini iena ciuanona, jacinaitimaci. Bimiemo ie uaina Jusiñamui fecajana naimaci uiñuamona, Jusiñamuimo iobillacinona fecadimaci.

*Jesúdi Mateona fetua rafue
(Mr 2.13-17; Lc 5.27-32)*

⁹ Jesús bai macaritemo, cuena ucubena oronomo cue raillana cide. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.
Naidacaida, naimie diga jaidicue.

10 Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci. 11 Nainomo fariseuai comini jamai bitimaci. Moisés micori llogacinodo eo jaidimaci. Jesúna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

12 Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaidimaci. Ie isoide. Mareuidino cuena jitaiñedimaci; ia maraiñedino cuena jitaidimaci. 13 Jusiñamui facaina lloraima micori jaie cuega rafuemo omoi comeciaina faca: “Jusiñamui llote: ‘Rana cuemo omoi fecajana jitaidicue; ia cominina omoi dueruillana jiai jitaidicue’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibiñedicue; iadedi Jusiñamui dibeimo naimaci illena, maraiñedinona itatajaibiticue. Omoimona maraiñedino diga nabairiticue; ia naimacina uaibiticue.

Jesús dine Juan Bautista llofueoicaigano billa rafue

(Mr 2.18-22; Lc 5.33-39)

14 Naie facaise Juan Bautista llofueoicaiganodi Jesús dine bite. Naimiemo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedicai. Cai jeacino facaina sunaicabiticai. Fariseuai comini jiai guiñedimaci; iadedi o llofueoicaigano guitimaci. Cai einamací llogacínodo jaidicai. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

¹⁶ Jiaie rafuedo iena lloiticue. Nia joneña comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai marañeno cioite.

¹⁷ Jacagomona finoca bolsa como finoca vino joneña. Jonegadena, mairiñena jira, sirillamona, igoí raire cuararite. Vino faifite. Igoí jiai faifite. Como finoca vino comogomo jonelle. Iemei iena faifiñeite. Ie isoide. Omoí einamací rafue ifomo jiaie rafue birui ite. Iena omoímo llocabiticue. Iedo jaidicai —llote.

Jesúdi mena duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúna duere jicanollena, caiñici ifodo rainadacaida llote:

—Cue jisa como fiodaite. O onolli naiñaiño o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiai jaidimaci. ²⁰ Bai jaillanona, duidiñaiño jinafona jaide. Naimie iniroina jellana, naimie dine bite. Ie jeraimona doce años jaca diaide. Billanona naimie iniroina jettade. ²¹ “Naimie iniroi cue jetajamona jilloiticue” comecina facajamona, naiñaiño naimie iniroina jettade. ²² Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuená o inua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñailana cacade. ²⁴ Jesús dinena raite:

—Jofomona nana omoi jino jaillana jitaide. Cuemona biñaiño fioidaidesa. Jamai inde.

Iena cacajano, naiñaiño jai fiodaite uiñuamona, Jesúsri jaisitimaci. ²⁵ Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

²⁷ Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúsna ado uaidotiaímaiaí:

—Cai illaíma David micorí jittodio. Jusiñamuimona o billa jira, cocona duenai.

28 Uai oñeno Jesús Capernaumo jaide. Naimie fo jailla mei, naimie dine bitiaimaia. Iaimaiaimo Jesús jicanote:

—¿Omicono cue jillotajana ñnotomico?

Fairiotiaimaia:

—Jii.

29 Iaimaia uisina Jesús jetajano raite:

—Cueno omico ñnua diese jilloitomico.

30 Ieconiaimaia uisidi ciode. Jesús naie rafuena lluaña eo janotade.

—Bumo lloñeno —llote; 31 iadedi iena llocana jaidiaimaia. Iemona Jesús mameci nana naie eniruemo itinomo soride.

Jesús ñaiñedimiena jillotaja rafue

32 Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide. 33 Jesús Janabana oni orede. Oretaja mei, naie ñima ñaite. Nainomo ite comini rajicaillanona raitimaci:

—Cai comini dine bie isoide ñima jilluana jaca cioiñedica.

34 Ie jira fariseuai comini dinena raitimaci:

—Taife ñibeimo Janaba illamona, Jesúsdi Taife uaido Janabana oni orede —raitimaci.

Jesúdi cominina duenalla rafue

35 Diga ñairaiaimo ie llofueoicaigano diga Jesús llocana jaide. Nainomo judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui ñibeimo naimaci comeci iuaina meiduana llofue. Ailluena duidinona jillotate. Naga isoide duicomona jillotate. 36 Naimacina duenaite.

Naimaci comeciai iticino oni duiñoitimie iñena jira, naimacina duenaite. Ailluena cominina cide. Toica llaudaiai isoi ebe isoi jaidimaci. Naimaci comeciai ocuiñoñidimaci. Jusiñamui naimacina sedaacana uiñoñedimaci. ³⁷ Naimacina duenaillamona, ie llofueoicaiganomo lote:

—Ilimo ailluena trigo ia, iena ollena, ailluena maijirainina jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo iñedimaci. ³⁸ Ie rafue naimaci llollena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue (Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duicono oni oretallena, iena jiai iñonocaide. ² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiai Zebedeo jito iaimaiai. ³ Felipe. Bartolomé. Tomás. Cueno jiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. ⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúna gaitatate.

Jesúdi ie llofueoicaiganona oretaja rafue (Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judíuáiñedino dine jaiñeno. Samaritano railla comini dine jaiñeno; ⁶ ia cai judíuái comini dine jai. Naimacimona ailluena comini Jusiñamui rafuena nia ñnoñedimaci. Faificana nia jaidimaci. ⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. ⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno. ⁹ Ucubena uiñeno. Guille ifo meidollena, rana uiñeno. ¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jguidana uiñeno. Jiae cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno. ¹¹ Nie nairaimo omoi ria, omoi rafuena jitaidimienena jeno, naimie jofomo omoi illena. Naie jofomo omoi i, naie nairaimo omoi ille dinori. ¹² Naie jofomo omoi rillanona, naie cominina marena uaido. ¹³ Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitaiñenia: “Jusiñamui omoina canoite” naimacimo lloñeno. ¹⁴ Omoina bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina jaidino. Maraiñede rafuena naimaci finuana naimaci uiñollena, omoi eilliaina jaidino. ¹⁵ Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo

finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuenal lua rafue

¹⁶ Jesús ie llofueoicaiganomo nial lote:

—Naimacina janallari fañellena, naimaci duere sefuñellena, toica llaudaiai raise sedajana jitaidimaci. Ie isoide. Eo marañede comini motomo omoina oretaiticue. Omoina duere finoacanitimaci. Raise sedajana jitaidomoi. Jaio fiodañellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i. ¹⁷ Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci. ¹⁸ Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloitoimoi. Naie illaicominimo iena jiai lloitoimoi. ¹⁹ Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi. ²⁰ Dani omoi comeciai icinodo ñañeitomoi; ia Jusiñamui Joreño uaido ñaitomoi. ²¹ Cuenal ñnotomoi; ial ailluena cuenal ñnoñeitimaci. Cuenal omoi ñnua jira, omoinal enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruiaidi naimaci moonal, naimaci einal

meinetallena, naimacina llogidoitimaci. ²² Cue muidona ailluena comini omoina enoitimaci; iadedi cue uaina fainonocaiñedime cue Moo diga monamo ja muidomo jaca iite. Naimiena jillotaiticue. ²³ Cue rafue naimaci jitaiñenamona, omoina nie nairai duere finoia, dinomona cue rafuena lollena, jiaie nairaimo raire jai. Cue rafuena omoi lollena, diga judiua illanuaimo nia jaitomoi. Nana naie comini nia inoñenia, Jusiñamui dinena dane abido biiticue. ²⁴ Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaima daje isoi duere sefuite. ²⁵ Ie isoide. Cue cominina omoi jaillamona, cue duere sefuia, jiai duere sefuitomoi. Taife mameci jiaici llinuanona, “Beelzebúdio” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiai jeare ñaitimaci.

Jesúdi jaciruiñeno llofuia rafue

(Lc 12.2-9)

²⁶ Jesús nia llote:

—Cuenta inoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. ²⁷ Omoimo rafuena anado jai lloticue. Iena nana cominimo marefodo llono. Ado llono. ²⁸ Omoi abina meinedimaci; ia omoi joreña meinenidimaci. Omoina naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoina duere finoacadinona jaciruiñeno. Ero mena janorede

sillina fecadomoina, eo janore ibaca; iadedi cai Moo Jusiñamui jítaiñenia, naimacimona daje fioldañede. ³⁰ Ero, niga ifotirai omoimo illana Jusiñamui uiñote. ³¹ Naimiedi omoina sedajana jiai uiñote. Silliñiai baifemo Jusiñamui isiruigaomoi. Omoi duere finoacadinona jaciruiño. Jusiñamui jítaiñenia, omoimo jaca buena suiñeite.

*Jesús naimiena janoñenana llofua rafue
(Lc 12.8-9)*

³² Ie llofueoicaiganomo Jesús nia llote:

—Cue rafuena omoi llumona, jiaino omoina duere finoitimaci. Cuená birui omoi janoñenia, nana comini Jusiñamui uicomo ico ia, nainomo omoina janoñeiticue. “Cue cominidomoi” omoina raiticue. ³³ Cuená birui omoi janoia, nana comini Jusiñamui uicomo ico ia, nainomo omoina janoititcue. “Cue cominiñedomoi” omoina raiticue.

*Jesús muidona nana comini uri iñena rafue
(Lc 12.51-53; 14.26-27)*

³⁴ Ie llofueoicaiganomo Jesús nia llote:

—Nana cominina uri itatallena eniruemo biñeditcue. Cuená ñnoñedinodi cuena ñnotinona enoitimaci. Enoillamona cuena ñnotinona duere finoitimaci. ³⁵ Cue lloga rafuena damierie ñnua muidona, ie moo illa ñbeimo ie jito iñeite. Ie ei illa ñbeimo ñaiñaiño jisa iñeite. Ie jifaiño illa ñbeimo ñaiñaiño mio iñeite. Iese cominina uri itatañeditcue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moona cue baifemo bu isiruia, ie eina cue baifemo bu isiruia, cue jitailla ra naimie finoacaiñena jira, cuemo raise ñuñede. Ie uruia cue baifemo bu isiruia, cuemo raise ñuñede. ³⁸ Cue facaina bu

fiodaiacaiñenia, cuemo raise duiñede. Naimiedi cue comini naimiena lloiacaiñedicue. ³⁹ Cue facaina fiodaiacaiñedimie ja muidomo faifite. Cue diga jaca iñeite; iadedi cue facaina fiodaitimie monamo cue diga jaca iite.

*Jesús Jusiñamuimona ibana feiñua llua rafue
(Mr 9.41)*

⁴⁰ Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote. ⁴¹ Naimie cue comini illamona, damierie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite — llote. Iemei Jesús ie llofueoicaiganona, ie rafuena lllena, orede.

11

*Jesús dine Juan Bautista micori ie
llofueoicaiganona oretaja rafue
(Lc 7.18-35)*

¹ Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uifollena, Jesús dine ie llofueoicaiganona orede. ³ Jesúmo llotimaci:

—Juan Bautistamona biticai. Jofue ifnenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uifoiacadicai. Imieñedidena, jiaimie billemo nia ocuridicai.

⁴ Jesús uai ote:

—Cue llwana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. ⁵ “Uisidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono. ⁶ Jiai llono: “Ñibai nana cue rafuena raise cacaiñedio; ia cuena jaca nia inocana o jaja, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue ifnenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoifede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie dine jaidomoi? Mare iniroina jitadimiena cioifedomoi. Mare iniroina jitadinona omoi cioacaniadedi, illacomini dine jaidomoi. ⁹ Jusiñamui facaina

lloraimana ciidomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ¹⁰ Malaquíás micorí naimiena jaie cuega:

Jusiñamui raite: “Ero, o uicodo cue rafuena llo-lena, damiena oretaiticue,

comini comeciaina marecinona duiñollena” cuega. Malaquíás Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuate; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi. ¹² Juan llofua tainiamona ailluena comini cue rafuena ñnuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriaidi cue billena jaie llotimaci. Moisés micoriena jiai jaie llote. Juan facaise naie llogacino jai suide. ¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena ñnotomoidena, Juandi naimiena uiñotomoi. ¹⁵ Omoi jeforena jira, raise fueollena, cue llamo cacarei.

¹⁶ Jesús nia llofuate:

—Ero, omoina ñaiticue. Jifanote uruiái isoidomoi. Uruiai jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadicaí; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí”

raitimaci. ¹⁸ Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. ¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenajia gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. Iese raitomoi; iadedi Jusiñamuina inotinodi cue finoca rafuena marenana uñotimaci.

*Dajerie nairai Jesúna inoñena rafue
(Lc 10.13-15)*

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uñotimaci; iadedi naimaci comeciai iuai meidoñedimaci. Ie jira naimacina ñaite. ²¹ Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi inoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uñotallena, ebinide iniroina jitajanona, naimaci ifogiamo jusefona jonetimaci. ²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoimona damierie Capernaum railla illanomona bitomoi. Birui

abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñenia, monamo cue Moo diga jaca iñeitomoi; iadedi naimie omoina duere finollemona sunaitomoi. ²⁴ Jusiñamui uicomo nana comini ico ia, cue rafuena omoi iinoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi. ²⁸ Omoi jeacinomona omoi jillobillena, duere jaidomoi. Omoi comeciai marena uri illena, cue dibeimoi mai omoi i. ²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite. ³⁰ Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

12

Sábadoruimo Jesús llofueoicaigano maijia rafue (Mr 2.23-28; Lc 6.1-5)

¹ Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano aimetailla jira, trigona tijiano, golluano, guicana jaidimaci. ² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciái raise facañedomoi. David micori guille iñenia, naimie aimetaia, ie nabaiñiaí diga, Jusiñamui jofomo fo jaide. ⁴ Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiaí diga David micori iena guite; ia Jusiñamui naimacina duere finoñede. ⁵ Moisés micori llogacino mo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijiuidimaci. Jusiñamuina naimaci sedallena, ocainana fatimaci. Iraina bonodimaci. Iese maijiuidimaci; iadedi Jusiñamuimona jeacino finoñedimaci. Moisés micori jaie ciegafuiaina raise cacañedomoi.

Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloraima iena jaie cuela: “Cuemo rana omoi fecajana jitaicue; ia omoi jitaillamona, jiaie cominina omoi duenailacinodi rana cuemo fecajacino baifemo faite”. Iena omoi uinotomoidena, cue llofueoicaiganomo: “Maraiñedinona finodomo” lloñedomoi. Cuemona cue llofueoicaigano jeacino finoñedimaci. ⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jia rairuiredicue.

*Jesúdi onollina idisarodimienajillotajarafue
(Mr 3.1-6; Lc 6.6-11)*

⁹ Bai jaillanona, nairai dine rillanona, naimaci ofiracomo Jesús fo jaide. ¹⁰ Nainomo onollina idisarodimie illanona, fariseuai dinena Jesúsimo jicanotimaci:

—¿Sábadoruimo bimiena o jilloitajana mare? — jicanotimaci. Sábadoruimo duidimiena bu jillotaia, naimacimona naimie jai maijde. Uai uanona: “Mare” Jesús raialedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi. ¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode. ¹⁴ Iena ciuanona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cuená llocana jaiñeno —naimacimo llote. Naimie mameci are sorillana jitaiñede. Fariseuai diga ie uai uaitaiacaiñede. ¹⁷ Iemona Isaías micori jaie ciegafuai jai suide. Jusiñamui Isaías micorina jaie cuetataga:

¹⁸ Ero, cue fetoca mullaíma ite.

Naimiedi cue isiruigamie. Naimieri iobidícue.

Cue Joreño naimiemo cue fecajanona, judíuaiñedinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue lluamona, naimiena ñnotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuaiñedinon naimiena ñnoitimaci.

Fariseuai Jesúna jeare ñaia rafue

(Mr 3.19-30; Lc 11.14-23; 12.10)

²² Jesús dine damieredi Janaba ie anamo illamiena atidimaci. Janaba anamo naimie illa jira,

naie aticamiēdi cioiñede. Jiai ñaiñede. Jesús Janabana oni oretajanona, naimiena jillotate. Naimie uaina botade. Ñaite. Ciode. ²³ Naiena ciolino rajjicaillanona raitimaci:

—Nibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate — raitimaci.

²⁵ Naimiena naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi. ²⁸⁻²⁹ Ero, maíridimie ie jofomo ite rana nibai fiñacadomoi. Iena fiñllena, naimiena nano raise omoi maiga. Raise maia mei, ie rana fiñredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uiñotomoi. ³⁰ Cue dibeimo

iñedimie cuena enoide. Cue dibeimo cominina itatañedimiedi naie cominina cuena inotañede. ³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini maraiñedinona dotarede; iadedi naimiedi ie Joreñoa jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena feitarede; iadedi naimie Joreñoa omoi jeare ñaia, Jusiñamui iena birui feitañeite. Iena ico jaca feitañeite.

*Jesúdi riará llisilla llua rafue
(Lc 6.43-45)*

³³ Jesús llote:

—Llissillamona nie isoide riará illana uiñoticaí. Amena ie llisilla llillamona, amena marena uiñoga. Llillamona, amena maraiñenana jiaí uiñoga. ³⁴ Ie isoide. Omoi ñaiamona omoína uiñoticaí. Cuena omoi maraiñeno ñaia jira, omoi comeciaí iticinona uiñoticaí. Omoi maraiñena jira, jaio nairaídomoi isoidomoi. ³⁵ Mareuidimie mare ie comecimona ñaite; iadedi maraiñedimie maraiñede ie comecimona ñaite. ³⁶ Jamái ebena birui omoi ñaia, Jusiñamui uícomo nana comini ico illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciaí iuai meido.

*Dajerie Jesús siño rafuena fñuana jitailla rafue
(Mr 8.12; Lc 11.29-32)*

³⁸ Naie facaiseconi dajerie Moisés micorì llogacìnona llofuerainì dajerie fariseuai d'iga Jesúmo llotimaci:

—Maestro, o lloga uaina cai ñnollena, siño rafuena o finuana cioacadícai.

³⁹ Jesús uai ote:

—Maraiñedicinona finocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micorì jaie ite rafuena uiñotomoi. Naiemo omoi comeciaina omoi faca. ⁴⁰ Darui amani aillue lliciai jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloiticue. ⁴¹ Lliciai jeraimona naimie jillua mei, Nínive railla nairai ñine Jonás micorì jaide. Nainomo Jusiñamui rafuena llote. Naie comini iena cacajano, naimaci comeciai icinuaina meidotimaci. Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoina rañeiticue. Jonás micorì baifemo birui uaidicue; iadedi cuena ñnoñedomoi. ⁴² Ero, Saba railla nairai ie illaiño micorìdi Salomón micorì ñine jaie aarena jaide. Naimie micorì uiñuacinona naiñaiño micorì cacareillena, aarena jaide. Salomón micorì baifemo birui uaidicue; iadedi cuena ñnoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micorì omoina ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoina ico ñaite.

Janaba anamo illamie rafue
(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. ⁴⁴ Baiñena jira, naimie começina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite. ⁴⁵ Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiai naimie baifemo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci inoñenia, eo fodo jaitimaci.

Jesús ie comini
(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. ⁴⁷ Damie Jesúmo llote:

—O ei, o amatiai diga, jino ite. O diga ñaiacade.

⁴⁸ Naimiemo Jesús dinena jicanote:

—¿Bu cue ei? ¿Bu cue amatiai?

⁴⁹ Ie llofueoicaigano dine ie onolli ñuitajanona, raite:

—Jadi, cue ei, cue amatiai. ⁵⁰ Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue
(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue dine jaide. ² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimo llote:

—Jusiñamui omoina sedaacana omoi fueollena, bie rafuena lloiticue. Damie trigona judaiaide. ⁴ Naimie judaia mona, naisomo janore iduai juide. Naimie bai jailla mei, silliniiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona, riarra eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote. Jia inamona sesenta diga llisillana ote. Jia inamona treinta diga llisillana ote. ⁹ Omoi jeforena jira, raise fueollena, cue lluomo cacarei. Iena ino.

Jesús ie como lloga rafuena llofuia rafue

(Mr 4.10-12; Lc 8.9-10)

¹⁰ Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoina ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñoñañede. ¹² Jusiñamuina inotimie Jusiñamui rafuena inocana jaite. Jusiñamui naimiena uiñotaite; iadedi Jusiñamuina inoñedimie Jusiñamui rafuena uiñoñecana jaite. ¹³ Ie jira bie isoidicinodo naimacimo lloticue. Cue siño finoca

rafuena cioidimaci; iadedi iena naimaci #noñena jira, uiñoñoeno jaitimaci. Cue llofuiana jamai cacaidimaci; iadedi naimaci #noñena jira, raise cacaiñedimaci. Uiñoñedimaci. ¹⁴ Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona”.

Isaías micori Jusiñamuina #noñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi #nua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie #notino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimi ena llua rafue

(Mr 4.13-20; Lc 8.11-15)

¹⁸ Jesús llote:

—Ero, omoina trigo iduaina judaidimie rafuena llofueitucue. ¹⁹ Dajerie iduai naisomo juide. Dajerie comini comeciai naie naiso

isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina inotañede. ²⁰ Jiaie iduai noñemo juide. Dajerie comini comeciai naie noñe isoidimaci. Jusiñamui uai nano naimaci cacaja, iena caimare feiñotimaci. ²¹ Noñemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefuia, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitailla rafuena finocana jaiñedimaci. ²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. ²⁵ Naimie inia mei, ie enoidimie trigona eruaide raiticiaina bainino judaiaide.

Iemei oni jaide. ²⁶ Trigo sicuamona lliside. Naie facaise naie raiticiai como raise bairede. ²⁷ Judaidimie maijiraini iena cianona, naimiemo llote: “Mare iduai navui ritio. ¿Niesedeta raiticiai eo sicode?” ²⁸ Uai ote: “Cuen a enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?” ²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede. ³⁰ Danomo sicote. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue
(Mr 4.30-34; Lc 13.18-19)

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode. ³² Mostaza ido eo janorede; iadedi sicua mei, eo aillue riará jaillamona, nainomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue
(Mr 4.33-34; Lc 13.20-21)

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraima micori iena jaie cuela:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaisemona jaca bu iena uiñoñede.

Birui naimaci uiñollena, iena lloiticue”.

Jesús trigo motomo riga raiticiaina llofuia rafue

³⁶ Comini jino fainonocada, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloiticue. ³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisaí.

Trigodi cuena ñnotino. ⁴⁰ Jobailena raiticiai ofitaja isoi, ico abido cue bia, daje isoi iite.

⁴¹ Cue jaienisaína oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitimaci. Subicaitimaci. ⁴³ Iemei jitoma lligaiñua isoi, Jusiñamui sedajonomo naimiema ñnotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuñellena, cue lluaña ñno.

Jesúdi eniruemo isiruiga reica rana llofuia rafue

⁴⁴ Jesús lloite:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino ibaacadu, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena ibaite. Ie isoide. Jusiñamui illanomo omoi illena, jiaie rafue uanona jaiñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús lloite:

—Jusiñamui dibeimo comini jailla rafuena lloiticue. Iena omoi raise uñollena, perlas railla rana ibaraimana lloiticue. Eo mare perlas iballena jenocabide. ⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús lloijina ñaia rafue

⁴⁷ Jesús lloite:

—Jusiñamui dibeimo comini jailla rafuena lloiticue. Iena omoi raise uñollena, lloijina lloiticue. Joraimo lloijina comini faianona, naga isoide lliciaina otimaci. ⁴⁸ Ari sonua mei, mare lliciai diese fetodimaci. Marañede lliciai diese oni faitimaci. ⁴⁹ Ie isoide. Ico abido cue bia, iese iite. Jusiñamuina ñnotinomona naimiena ñnoñedino diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina ñnoñedinona dotaitimaci. Nainomo eo duere sefuillamona eitimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicanote:

—¿Nana cue lluaana cacadomoi?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuelena, naimacina caimare itatallena, jofa nama ie mare raruaímona naimaci jitailla ra naimacimo fecade. Comini comeciaina lloticue. Jusiñamui facaina lloraíni micoriai llogacinona uiñotomoi. Cuedomona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi raijicaillamona raitimaci:

—¿Niese naimiedi eo abina uiñote? ¿Niese siño rafuena naimiedi finode? Naimiedi jamai bue isoidimie. ⁵⁵ Naimie amederaíma jito. Naimie eidi María. Naimie amatiáidi Jacobo, José, Simón, Judas. ⁵⁶ Naimie miriñotiaídi cai motomo jiaí ite. Naimaci diga nagarui nabairiticaí. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaímo naimie ia, ie risoilla jofomo naimie ia,

ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina iinoñedomoi.

⁵⁸ Naimie uaina naimaci iinoñena jira, Jesús ail-luena siño rafue finoñede.

14

Juan Bautista micori fiodailla rafue (Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade. ² Naimie ecimo majiuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraimana naimaci raillanona, naimie micorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomo llote:

—Ñie isoide rana o jitaiadedi, omo iiticue. Illaïma uai cuemo illa jira, iena ua finoiticue.

⁸ Naiñaiño ei naiñaiño mo lluanona, naiñaiño uai ote:

—Juan Bautista ifogì bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorìna meinetajana llote.

¹⁰ Ie lloga uaina finollena, cárcelmo soldadona orede. Nainomo Juan micorì ifogìna jaitade.

¹¹ Bandejamo naimie micorì ifogì jonecaida, soldado atiano, Herodías jisamo fecade. Ieconi ie eimo fecade.

¹² Iena fidiano, Juan micorì llofueoicaigano naimie micorì abina uaibitimaci. Iena naimaci raia mei, Jesúmo lluidimaci.

*Jesús cinco mil iñiaïna ecaja rafue
(Mr 6.30-44; Lc 9.10-17; Jn 6.1-14)*

¹³ Juan micorì meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci.

¹⁴ Eniruemo Jesús sijia, ailluena cominina dafafide. Naimacina ciuanona, naimacina duenaillanona, duidinona jillotate. ¹⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenoico, mena lliciai diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomenoico naie mena lliciai diga uanona, monamo eruaillanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena.

²⁰ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. ²¹ Cinco mil iñiaiai diese guitimaci. Naimaci aitiaiai jiaiai guitimaci. Naimaci uruiaiai jiaiai guitimaci.

*Jesús jinui emododo macarilla rafue
(Mr 6.45-52; Jn 6.16-21)*

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci cianona, jacinaillamona, raitimaci:

—¿Bu joreño caimo billana ciodicai? —
Jacinaillamona cuiroidimaci. ²⁷ Naie daciaño Jesús naimacimo llote:

—Omoi joreñonicaiño. Cuesa. Jaciruiño.

²⁸ Pedro uai ote:

—Uanai cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰ iadedi aifi billana naimie ciuanona, jacinaita. Jinuimo anabaiacade. Ado cuirioide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina inotio. ¿Bue ñellena eo inoñedio? Cuen a inotiodena, jinui emododo cue dine niadedi ridio.

³² Botemo a iaiaiaia jaillamona, ie facaise aifi lliaicade. ³³ Ie jira botemo itino Jesúmo iobil-lacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret railla eniruemo ridimaci. ³⁵ Jesúsna nainomo itino uinamona, naimie dine duidinona atillena, nana nairaimo jiaie cominina oredimaci. ³⁶ Naimie dine billanona, dani ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloitica” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue

(Mr 7.1-23)

1 Jerusalémona fariseuai comini Jesús dine bitimaci. Moisés micori llogacinona llofueraini jiai bitimaci. 2 Naimiemo jicanotimaci:

—¿Bue ñellena o llofueoicaigano cai einamací rafuedo jaiñedimaci? Naimaci guiacania, naimaci onolli cai einamací llua isoi raise jocoñedimaci. Ie jira cai abimo jeacino finodomoí.

3 Jesús uai ote:

—¿Bue ñellena nana Jusiñamui llogacinodo jaiñedomoí? Omoí einamací llogacinodo jaidomoí; iadedi nana Jusiñamui llogacinodo raise jaiñedomoí. 4 Jusiñamui jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”. 5 Iese Jusiñamui llote; iadedi omoí einamací llotimaci: “Jusiñamuimo cai ucubena cai fecajamona, cai moona, cai eina jai canonidicai”. 6 Iese omoí finocabilla jira, omoí einamací llogacinodo omoí jaillamona, Jusiñamui uaina jamaidomoí. 7 Mareuidinona abi caitauidinodomoí. Isaías micori omoína jaie raise llote. Naimiedi Jusiñamui llua cuete:

8 Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruticai” llotimaci. “Ona sedadicaí” llotimaci.

Jamai ñaitimaci. Naimaci comeciai cue dibeimo raise iñede.

9 Cue uai itena, jamai comini llucacinona naimaci llofuecabilla jira, taínona cuena sedadimaci.

10 Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoï uifollena, cue llamo cacarei.

¹¹ Omoï einamacï isoi omoï guifñenia, naimacï isoi omoï onollina omoï jocoñenia, omoï comeciaina jearetañedomoï. Omoï guigamona, omoï onollina jocuamona, Jusiñamuina nabaiñedomoï. Omoïmo jeacino illa jira, Jusiñamuina nabaiñedomoï. Omoï comeciain jearena jira, jeacina finocabidomoï.

¹² Ie llofueoicaigano naimiemo lluaibitimacï:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimacï rafue cue Moomona oñenia, ja muidomo ieconi duite.

¹⁴ Naimacina fañonocai. Uanaicinona naimacï uifñoñena jira, uisnidino isoidimacï. Jaimiena uisnidime ifoia, dafomo uaidiamaia. Ie isoide. Uanaicinona fariseuai uifñoñena jira, uanaicinona llofuenidimacï. Uanaicinodo jaiñedomacï. Ja muidomo faifitimacï.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Niese cue lluaña jiai nia cacaiñedomoï? ¹⁷ Nie isoide ra guitomoina, omoï jebemo jaide. Ie mei omoï abiamona jino bite; ¹⁸ iadedi omoï comeciaino iticinomona jearedena ñaitomoï. Omoï comeciain jearena jira, jearede rafuena finocabidomoï. ¹⁹ Omoï comeciain jearena jira, jeare comeciaina facacabidomoï. Comena meinecabitomoï. Omoï aiñede riño diga icabitomoï. Omoï iniñede iima diga icabitomoï. Firicabitomoï. Tainona llogiricabitomoï. Jiaie comini joreña jeare ñaicabitomoï. ²⁰ Bie isoidicinuai omoï comeciaino illa jira, jearede

rafuena finocabidomoi; iadedi omoi einamac; llua isoi, omoi onolli jocoñenamona jeacino comuiñede.

Jesúdi judío iñaiñoñediñaiñoa jillotaja rafue

(Mr 7.24-30)

²¹ Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide. ²² Ie facaiseconi naie eniruemona judíuñediñaiño di billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

²³ Jesús uai oñede. Ie jira ie llofueoicaigano naimie dine billanona, duere llote:

—Naiñaiñoa abido ie jofomo oreta. Caimo duere jicanuaibitesa.

²⁴ Jesús uai ote:

—Faificana jaillana naimaci jai jailla jira, dani cai judíuai cominimo cue Moo cuena oretate. Naimiedi judíuñediñaiño mo cuena oretañede.

²⁵ Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

²⁶ Judíuaiñedinona naimie canoñenana naiñaiño uñollena, naiñaiño mo Jesús llote:

—Urui ai guillamona jiconiaina ecadicaidena, marañede.

²⁷ Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comequina facade. Uruiaina llote; iadedi judíuaimo comequina facade. Jiconiaina

llote; ia judíuainēdinomo jiai comečina facade. Comečina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jesús uai ote:

—Cue uaina o inua jira, o jitailla rafuena finoiticue. —Ieconí nainiñaiño jisa jillode. Janaba nainiñaiñomona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei, ³⁰ ailluena comini naimie dine bitimaci. Ailluena duidinona atidimaci. Nua-ñujacaida macaritinona, onollina idisaruidinona, uisnidinona, uainidinona atidimaci. Diga duidinona naimie dine atidimaci. Iemei naimacina jillotate. ³¹ Ailli uainidino jai ñaiana cacajamona, ailli onollina idisaruidino onollí jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisnidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

Jesúdi cuatro mil iñiaina ecaja rafue

(Mr 8.1-10)

³² Jesús ie llofueoicaigano naimie dine uaidu-
anona, raite:

—Bie comini darui amani bene cue diga illa jira, naimacimo guille jai inede. Naimacina aimeri ore-taiacaiñedicue, naisomo naimaci bai raillanona. Naimacina cue duenailla jira, naimacina canoacadicue.

³³ Jicanotimaci:

—¿Ninomona guille oiticaí, naimacina caí ecalena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriai caimo jiai ite.

³⁵ Comini ana raillena Jesús llote.

³⁶ Naie llomenico llicisiriai diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena. ³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ³⁸ Nainomo cuatro mil iñiaí guitimaci. Naimaci ainiaí jiai guitimaci. Naimaci uruiaí jiai guitimaci. ³⁹ Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16

Fariseuai comini Jesúsmo siño rafuena finuana jicanuano billa rafue

(Mr 8.11-13; Lc 12.54-56)

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiai bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena caí cioillena, Jusiñamuina siño rafuena finota.

² Jesús uai ote:

—Jitoma sojcaidemo, mona jiairenia, raitomoi: “Ico are maremonanite”. ³ Jiai raitomoi: “Jitiramo mona jiairenia, ja noci deite”. Monamo omoi eruailamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofua rafue
(Mr 8.14-21)

⁵ Ruica dne naimaci rillanona, ie llofueoicaigano llomeniconna feillana uibiñotimaci.

⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuilena ñaite. ⁷ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atañena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoina canoredicue. ¿Bue ñellena dani omoi llomenico iñenana siadotomoi? ⁹ ¿Niese ñnoñedomoi? ¿Niese cue navui siño finoca rafuemo comeciaina facañedomoi? Navui cinco mil iñiaí cinco

diganicodemo guitimaci. Monillamona, guigamona fiebillamona, doce cirigaiamo iraidomoi. ¹⁰ Jiaicaiño cuatro mil iñiaí siete diganicodemonona guitimaci. Monillamona guigamona fiebillamona, siete cirigaiamo iraidomoi. ¹¹ Omoína cue ecallena, ¿niese cuena birui iñoñedomoi? Llomeniconona ailli ñaiñedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaise naimie llwana jai cacadimaci. Llomenico siritate rana naimie ñaiñede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

Pedro Jesúsna llua rafue

(Mr 8.27-30; Lc 9.18-21)

¹³ Cesarea Filipo railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaíno raitimaci: “Jeremías micoridio”. Jiaíno raitimaci: “Jusiñamui facaina lloraíma micoridio”.

¹⁵ Jesús dane jicanote:

—¿Niese omoi cuena raitomoi?

¹⁶ Pedro uai ote:

—Odi cai jilloitaraímadio. Cristodio. Jusiñamui facaina lloraíni micoriaí o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo

Jusiñamui ona iena uiñotade. ¹⁸ Pedro, o começina uiñoticue. Cuena como o lloga uaina meidoñeitio. Bie rafuena jiaie cominimo o llua mona, jia iñnoitimaci. Cuena iñnuamona, cue cominina jaitimaci. Cue dibeimo iñedino iena itatanidimaci.

¹⁹ Ailluena cominimo Jusiñamui ie cominina jailla rafuena nano lloraimana jaitio. O llucínodo jaitino cue cominina jaitimaci. O llucínodo jaiñeitino cue cominina jaiñeitimaci

²⁰ Iena llua mei, ie llofueoicaiganona rairuide:

—Cue Cristonana bumona nia lloño.

Jesús ie fiodaillena llofuia rafue

(Mr 8.31-9.1; Lc 9.22-27)

²¹ Naie facaise mona ie llofueoicaiganomo Jerusalémo naimie jaillena marefodo llote:

—Nainomo cai judíuai illaicomini cuena eo duere fñoitimaci. Cuena meineitimaci; iadedi darui amani illanona, fiodaillamona jilloitícue.

²² Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñaiño, Taife isoi o começina o facaja jira. Jusiñamui isoi cuemo começina facañedio. Comini isoi cuemo começina facadio. Iese o começina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiña. Cue dibeimo naimie jaillamona, duere sefuicana jaite. Nibaí naiemona fiodaite. Bu iese jaiacania, cue dibeimo naimie iite. ²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere

sefuillana jaciruiñenamona cue cominina bu jaiia, jaca faifiñeite. ²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿ñiese cue Moo dine riite? Nainomo naimie riñeno faifite. ²⁷ Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue. ²⁸ Uanaicinona omoimo lloiticue. Omoimona dajerie nia fioidañeitomoimo, illaimana cue bairellena cioitomoio.

17

Jesús abi meidocaila rafue (Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uiñede. ² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie dacaiño eo userecaide. ³ Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraima. Jesús diga ñaitiaimaia. ⁴ Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie lluomo cacareillanona, iena ñno — lloste. ⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. ⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúna ciodimaci.

⁹ Anedumona bitimacimo, naimacimo Jesús lloste:

—Omoi ailli cïua rafuena bumo lloñeno, cue fiodaillamona cue jillua ñnori.

¹⁰ Naimiemo llotimaci:

—Moisés micorï llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamui mona o billana ñnoticai. Odi cai Jilloitaraimana ñnoticai. Odi cai Jilloitaraimadïomo, ¿bue ñelli iese raitimaci?

¹¹ Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise lllona. Jusiñamui ñibeimo naimaci illena, comini imaci comeciai meiduana lloste. ¹² Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

¹³ Ie muidona Jesús llofueoicaigano naimiedi Juan Bautista micorïna ñaiana jai uiñotimaci.

*Jesúdi Janaba anamo itimiena jillotaja rafue
(Mr 9.14-29; Lc 9.37-43)*

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Jesús

dine damie billanona, naimiena raise uaidu-
anona, caiñici ifodo rainadacaida raite:

¹⁵ —Maestro, cue jitona duenai. Janaba
anamo naimie ite. Iemona naillicabide. Duere
sefuide. Uai-uaicabide. Jiaicaiñodedi iraimo
uaillanona, uside. Jinuimo jiai uaillanona,
niadedi corobaite. ¹⁶ Naimiena jilloitallena o
llofueoicaigano dine naimiena atidicue; iadedi
naimiena jillotanidimaci.

¹⁷ Iena cacajanona, Jesús ie llofueoicaiganomo
llote:

—Cue uai siñonana nia ñinoñedomoi. Cue mare
rafuedo nia raise jaiacaiñedomoi. Omoi diga are
iticue. Raise omoi ñinollena, ¿nie dinori omoi diga
iiticue?

Naie duidimie moomo llote:

—O jito cue dine mai ati.

¹⁸ Naimiena atiamona, Jesús naimiemo Janaba
illana uiñote. Janabana Jesús lletaja jira, naie
uruemona Janaba oni jaide. Ieconí naie urue
jillode.

¹⁹ Ie mei ie llofueoicaigano Jesúmo anado
jicanotimaci:

—¿Bue ñellena Janabana oni oretanidicai?

²⁰ Uai ote:

—Raise nia omoi ñinoñena jira, uanaicinona
omoi mo lloiticue. Janaba oni oretallena, cue
uai navui omoi mo iticue. Birui raise cuena
omoi ñinoñena, bie Janaba oni oretanidomoi.
Jusiñamuina eo janore ñnotomoidena, diga
rana finodomoi. “Oni bai jai” bie anedumo
llo tomoidena, omoi na naimie canuamona, bie
anedu oni lliai bai jaite. Jusiñamuina omoi
ñnoia, naga rana finoredomoi. ²¹ Jusiñamuimo

omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano diga danomo itemo, Jesús naimacimo llote:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofofacaina damie ibataja rafue

²⁴ Capernaumo naimaci rilla mei, Jusiñamui jofoucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitonaiamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitonaiaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa

jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco icifnellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

*Jesús ie llofueoicaigano moto imiena ille rafue
(Mr 9.33-37; Lc 9.46-48)*

¹ Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiena ille?

² Iena cacajanona, Jesús daje urue uaiduanona, naimaci motomo jonete. ³ Uai ote:

—Uanaicinona omoimo lloiticue. Jusiñamui dibesimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. ⁴ Bie urue isoi abi iedoñedimiedi Jusiñamui ie cominina sedajanomo imie moto naimiena ille. ⁵ Bie isoidimie cuemo duillamona, naimiena feiñotimiedi cuena jai feiñote; ⁶ iadedi cuena inotimiena jeacinona finotaiacadimie iena finoñellena, jeacinona finotaiacadimie cimaiomo aillue nofici maianona joraimo corobaillena, naimiena dotacadena, cuemona mare.

*Jesúdi jeacinona finoñenana llofuia rafue
(Mr 9.42-48; Lc 17.1-2)*

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. ⁸⁻⁹ Biena ñaiticue. Nïe isoide rafue omoïna jeacino finotaia, iena llinñoeno. Naie rafue ñine jaiñoeno. Iemo eruaiñoeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui ñine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Irimo omoi jaiñoellena, jeacino finoñoeno.

*Jesúdi naimiena #notinomona damie faifillana
jitaiñoena rafue
(Lc 15.3-7)*

¹⁰ Jesús llote:

—Urue isoi omoi illena como lloticue. Iena dane lloiticue. Cue Moo naimacina uñua jira, bie urue isoidinona jamaiñoacaiñoeno. Monamo cue Moo ecimo naimaci jaienisai jaca ite, naimacina canollena. ¹¹ Jusiñamuimona cue billanona, naimiena #ñoñedinona naimaci jeacinomona jilloitallena biticue. ¹² Ero, omoimo iena jiaie rafuedo lloiticue. Damiemo cien diga toica llauða ite. Naiemona daje feiraite. Iena faifñoellena, jiaie llauðaiaina faionocaida, iena jenuaite. ¹³ Iena baillanona, ieri iobite. Baillari oni jaiñoñinori baifemo iobite. ¹⁴ Ie isoide. Jusiñamui naimiena #notinomona

damie faifillana jitaiñede. Ie jira naimacina jeacinona finotañeno.

Jesús omoi ecimo itimie omoína jeare fñuana llofuiá rafue
(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daímaiaí iena omico llono. O uai naimie fairioia, naimie o díbeimo jai iite. ¹⁶ O uai naimie fairioñenia, jiaí menamiena uiño, o lluomo íaimaiaí cacareillesa. ¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññoñedimiena omoi nabaiñena isoi, Moisés llogacínodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoñeno. ¹⁸ Iese omoi finoia, omoi comeciaí daje isoi lloillamona, Jusiñamuimona mare.

¹⁹ 'Omoimo nia lloitícue. Daje isoi comecina cue Moo Jusiñamuimo jicallena menamaiaí facajamona, cue Moomo íaimaiaí jianona, cue Moo íaimaiaí jitaille rafuena finoite. ²⁰ Menamie cue díbeimo illamona, damie amani cue díbeimo illamona, naimaci motomo itícue.

²¹ Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaitícue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloitícue.

23-24 'Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Dameo eo debede. Diez mil ucubena debede. ²⁵ Naimie ucube iñena jira, naie illaimadi ie cuenta iballena, naimie ai, ie urui ai diga, nana ie raruia ai diga, fecallena llote. ²⁶ Iena cacajano, ie illaima uicomo caiñici ifodo raita duere jicade: "Nama, dama ite. Fecuisse omo ibaiticue". ²⁷ Naimie duenailamona, naie illaima llote: "Ibatañeiticue. Cuemo jai debeñedio. Mai jai". ²⁸ Ie mei naimie jaide. Bai jaillanona, jiaie maijiraia diga dafai fide. Jai debeñedimieo janore debede. Cien ucubena debede. Jai debeñedimie dinena ie cimaina llinuana llote: "O debia cuemo mai iba". ²⁹ Ie jira debedimie caiñici ifodo ana rainadacaida, duere jicade: "Ucube cuemo iñede; iadedi cuena duenai. Fecuisse omo ibaiticue". ³⁰ Uai ote: "Ja raire jitaidicue". Naimiena duenaiñena jira, cárcelmo naimiena jonetade, ie cuenta iballe dinori. ³¹ Naimie nabaiñia iena fidianaona, sunaitimaci. Ie jira naimaci illaima dine nana naie rafuena lluidimaci. ³² Naie illaimadi nano debedimiena abido uaiduano, naimieo llote: "Maraiñedio. Navui o cuentana ibatañedicue, cuemo o duere jicanua jira. ³³ ¿Bue ñe o nabaina duenaiñedio, ona cue duenaila isoi?" ³⁴ Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori. ³⁵ Ie isoide. Cue Moo Jusiñamui omoia duere finoite, omoi comecia jitaillamona omoi ecimo itimie ie maraiñede finoca rafuena omoi feitañenia —llote.

19

*Jesús iima ie aina dotaja rafuena llofuia rafue
(Mr 10.1-12; Lc 16.18)*

¹ Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. ² Ailluena comini naimiena racadimaci Nainomo duidinona jillotate. ³ Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio? ¿Nie isoide rafue muidona damie ie aina dotarede?

⁴ Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaimaiaina finode. Iimana finode. Riñona jiai finode”. ⁵ Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiena jai jaide” llote. ⁶ Menade come jai damiena jai ite. Jusiñamui iese iaimaiaina itataja jira, iima ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; iadedi nano dofoconi iese iñede. ⁹ Jiaie riño diga naimie illena, ie aina bu dotaia, jiaie iima diga

naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús llote:

—Nana comini omoi como lluacinodo jainidimaci. Dani Jusiñamuina jitaidino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesúdi naimie dine uruiaí billana jitailla rafue
(Mr 10.13-16; Lc 18.15-17)*

¹³ Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lollena jitaidimaci. Ie llofueoicaigano iena rairuidimaci; ¹⁴ iadedi Jesús raite:

—Uruiaí cue dine billesa. Naimacina rairuiñeno. Cuena bie isoide inotinodi Jusiñamui ie cominina sedajanomo jainaiaidimaci.

¹⁵ Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue
(Mr 10.17-31; Lc 18.18-30)*

¹⁶ Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

¹⁸ Uai ote:

—¿Ñie llogacinuaina ñnoiticue?

Jesús dinena uai ote:

—Comena meineño. O aiñede riño diga iño. Fiiño. Jiaimiena o llogidoia, tainona lloño. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Ñie isoide rafuena nia fñnoiticue?

²¹ Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede. ²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena nia lloiticue. Igo ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaidi Jusiñamui cominina jaiticai?”

raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana fainonocaida, o diga jaicabidicai. ¿Ñiese Jusiñamuimona ibana feiñoiticaí?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiaí iite, nainomona omoi judíuai doce nairaiaina omoi sedallena. ²⁹ Cuen naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite.

³⁰ Jamai bue isoidomoi. Omoi mona jiaíno jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje

isoidimaci. Iena raise omoi uñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide. ² Dajeriena baillanona, “Omoimo daberie ibaiticue” llote. “Jee” raitimaci. Ieconí ie illimo maijillena, naimacina orede. ³ Jitoma nia oni daidemo, mercadomo naimie jiaínona ciode. Jamai itimaci. ⁴ Ie jira naimacimo llote: “Cue illimo maijiai. Raise ibaiticue” llote. ⁵ Ie mei jaidimaci. Jitoma naidai ia, jiaínona ciuanona, naimacimo maijillena llote. Jitoma oni caidemo, jiaínona ciuanona, naimacimo maijillena jiai llote. ⁶ Jitoma jasici muido itemo, jiaínona ciuanona, jicanote: “¿Bue ñellena namonana jamai itomoi?” ⁷ Uai otimaci: “Jaca caimo maijille rana budí lloñede”. Ie jira naimacimo llote: “Mai. Cue illimo maijiai” llote. ⁸ Jitoma edaciidemo, naie patrón ie mullaímamo llote: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote. ⁹ Ie jira jinafona maijiaidinona nano ibade. Dabe ibade. ¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñotimaci. ¹¹ Ie jira naie patrón joreña jeare ñaitimaci: ¹² “Jinafona maijiaidino dallu maijidimaci. Ecasilla facaise maijñedimaci; iadedi namonana maijidicaí. Dani cai ibaja isoi ibadio” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue. ¹⁵ Cue ucubena jira, cue jitailla isoi

cue ibaia, ¿niесе cuena jeare ñaitomoi? Jiainona cue duenaillanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uñollena, bie rafue jai lloticue. ¹⁶ Jamai bue isoidomoi. Omoimona jiaino jamai bue isoiñedimaci; ia naimie cominina naimaci jaillanona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite:

—Ero, Jerusalémo jai jaidicai. Monamona bil-lanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. ¹⁹ Judíuainedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiaí ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiaí ei diga, bitíiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidol-lena, caiñici ifodo ana rainadacaida llote:

—Omo daje rafue jicanoiacadicue.

²¹ Naiñaiño mo Jesús dinena jicanote:

—¿Bue ñiaíbitio?

Naiñaiño uai ote:

—Illaímana o jailla mei, cue jito iaímaiaí o ecimo illana o lluaana jitaidicue. Damie o nabeimo. Jiáimie o jarifebeimo. —Jiaino baifemo

iaimaia illena, naiñaño iese llote. ²² Naimacimo eruaillanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaño jito iaimaiaimo jicanote:

—¿Ie isoi duere sefuiacadomico?

Uai otiaimaia:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaiaimaiairi iciritimaci. ²⁵ Jesús nana naimacina uaiduanona, raite:

—Nana illaicomini naimaci anamo itinona ocuicabidimaci; ²⁶ iadedi omoi dine iese iñena. Omoimona bu imiena iacania, omoi mullaimana naimie jaisoillasa. ²⁷ Omoimona bu imiena iacania, omoina naimie canocana jaisoillasa.

²⁸ Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona jilloitimaci. Coninina omoi canua

—llote.

*Jesús mena uisnidiaimaiaina jillotaja rafue
(Mr 10.46-52; Lc 18.35-43)*

²⁹ Jericó railla nairaimona jaidimacimo, ailluena comini naimaci jinafona racadimaci.

³⁰ Ie facaiseconi mena uisnidiaimaiaia nai fuemo

raidiaimaia. Jesús naiedo jaillano cacajano, naimiena ado uaidotiaimaia:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Iaimaia llicaillena, Jesús diga jaidino iaimaiaina lletade; iadedi eo cuiroidiaimaia:

—Maestro, David micori Jitona o illamona, cocona duenai.

³² Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omicono cue nibaiana jitaicomico?

³³ Uai otiaimaia:

—Maestro, coco uisina o cioitajana jitaicococo.

³⁴ Iaimaiaina duenaillanona, iaimaia uisina jetaide. Ieconi iaimaia uisidi cide. Iaimaia jai cianona, ie llofueganona iaimaia jaillena, Jesús diga jaidiaimaia.

21

*Jesús illaima isoi Jerusalémo jailla rafue
(Mr 11.1-11; Lc 19.28-40; Jn 12.12-19)*

¹ Oni jaillanona, Jerusalémo iaireicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaina suiñuano bene ati.

³ Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaina jitaide. Nailli naimie iaimaiaina raire abido ore-taite” —raite.

⁴ Jusiñamui facaina lloraima micorí jaie llua isoi, bie rafue suide. ⁵ Naimie micorí jaie cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñeno biite.

Burra urue emododo naimie biite”

cuete. ⁶ Iaimaiaï jaïllanona, Jesús llua isoi

finodiaïmaiaï. ⁷ Burra ie urue diga atidiaïmaiaï.

Burra urue emodomo naimie llofueoïcaigano

naimaci iniroina jobianona, ie emodomo Jesús

rainadate. ⁸ Naimïena iobitallena, illaïma isoi

naimie jaïllena, aïlluena comini imaci iniroi

diga, naiso motomo jobedimaci. Jïaïno raforono

uanona, naiso motomo jobedimaci. ⁹ Dajerie

Jesús uïcomo jaidimaci. Dajerie naimie jïnafona

jaidimaci. Ado cuiiriisite:

—¡Cai Jilloitaraïma billa! ¡Naimiedi David micorí

Jito! ¡Jusiñamui mamecido bitimie eo mare!

¡Jusiñamui caïna jilloitajasa!

¹⁰ Jerusalémo naimie ridemo, nana nainomo

itino naie rafuena uïñoïacadimaci.

—¿Buta bite? —¡ïcanotimaci. ¹¹ Jesús diga bitino

dïnena uai otimaci:

—Jesús bite. Naimiedi Jusiñamui facaina

lloraïma. Galileamo ite Nazaret imie.

Jesúdi Jusiñamui jofomona damïerïena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofo eo aïllue. Diga cuartos

nainomo ite. Jusiñamuïmo ofomaïaïna fecallena,

naimïemo toïca llaudaïaïna fecallena, nainomo

comini jaisoidimaci. Naie cominina ïbatajanona,

ofomaiaina, toica llaudaia digá, damierie fecauidimaci. Iena Jesús ciuanona, naimaci mesaiaina oni caicode. Ucugina fecauidino rairacuai jiaí oni caicode. ¹³ Naimacimo llote:

—Ie facaina lloraíma Jusiñamui llogacino jaie cueda: “Cue jofo ite, nainomo cuemo comini jillena” cueda. Ero, ailluena omoi ibataja jira, naimie jofona firiruidino jofona omoi finoca.

¹⁴ Ie facaise uisidino Jusiñamui jofomo naimie dine bitimaci. Ñuja-ñujacaida macaritino jiaí bitimaci. Naimaci billanona, Jesús naimacina jillotate. ¹⁵ Nainomo Jesús digá mare rafuena finode. Digá comina jillotate. Iena ciuanona, nainomo ite uruiaí ado cuiriisite:

—David micori Jitori iobidicaí. Jusiñamui lloraíni micoriaí jaie llua isoi, caí Jilloitaraíma jai ite.

Iena ciuanona, iena cacajanona, judíuai illacomini iciritimaci. ¹⁶ Naimiemo jicanotimaci:

—¿Bie uruiaí cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Ñiese iena cacañedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷ Naimacina fainonocaida, Betaniamo Jesús jaide, nainomo inillena.

*Jesús higuera railla riarana faidua rafue
(Mr 11.12-14, 20-26)*

¹⁸ Ie areruido Jerusalémo abido ie llofueoicaigano digá Jesús bia, aimetaite. ¹⁹ Nai fuemo higuera railla riarana ciuanona, iena

jibuide. Naiemo naie llisilladi iñede. Dama ie ibena ciode. Ie jira naie amenana llote:

—Biemona jaca llisiñeite. —Iese railla dacaiño naie riaradi duide. ²⁰ Ie llofueoicaigano iena ciuanona, rajjicaillamona raitimaci:

—¿Niese naie riarara raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoi. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite. ²² Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofuede. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue. ²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llwana ñnoñedomoi?”

26 “Comini” cai fairioia, bene itino caina nibai meinitimaci, Juan micoridi Jusiñamui facaina lloraïma naimaci railla jira.

27 Ie jira fairiotimaci:

—Uiñoñedicaï.

Jesús dinena raite:

—Ie muidona cuemo nie isoide uai illana omoïmo lloñeiticue.

Jesúdi mena jito iaïmaiaï illa llua rafue

28 Judíuaï illaïcominimo Jesús llote:

—Bie rafuemo omoï comeciaina faca. Damiemo mena jito ite. Nano doforamiemo llote: “Moo, cue illimo birui maijiaï”. 29 Uai ote: “Jaiacaiñedicue” llote. Dallu illanona, ie comecina dane facajano, maijiaide. 30 Jiaïe jitomo daje isoi llote. Naimie uai ote: “Jii, maijiaïticue” llote. Iese llote; iadedi maijiaïñede. 31 ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoïmo lloiticue. Omoïna ñaiticue. Omoïmona marañedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaïdi nainomo jiaï iitimaci; iadedi nainomo jaca iñeitomoi. 32 Marena omoï comeciaina itatallena, Juan micori navui bite; iadedi naimie micorina ñinoñedomoi. Ucube oraini naimie micori rafuena ñinotimaci. Callirediñaiñuaï naimie micori rafuena ñinotimaci. Iena uiñotomoi; iadedi omoï comeciaï iuailaina meidoiñedomoi. ñinoñedomoi.

*Jesúdi marañede maijiraini rafuena llua rafue
(Mr 12.1-12; Lc 20.9-19)*

³³ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaité. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide. ³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feñollena; ³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci. ³⁶ Ie mei patrón jiaie mullaiaína orede. Naimacina jai duere finodimaci. ³⁷ Ja muidomo ie jítóna orede. “Cue jítóna jaciruitimaci. Naimie uaina ñinoitimaci” comecina facade. ³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judíuai illaicomini uai otimaci:

—Naie marañedinona dueruiñoeno meineite. Ie mei jiaie cominimo naie illi fecaite, iena sedallena, naiemona riarana feñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoína jaie cuete. Ie cuega-fuena raise facañedomoi. Naimie micori cuega:

Jofu finoraini jitañena noficidi nana naie jofomo
ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticai
cuega. Jusiñamui cominina damierie jaillana
naimie micori cuete. Jusiñamui oretagamiena
damierie jitañenamona, naimie cominina
jaiñeitimaci; iadedi Jusiñamui oretagamiena
ailluena ñnuamona, naimie cominina jaitimaci.
Ero, naimie micori caina cuete. Naie jofona
finoraini isoidomoi. Naie nofici isoidicue. Cue
rafuena omoi jitañena jira, naimie cominina
jaiñeitomoi. ⁴³Jusiñamuidi ie cominina sedajanomo
omoina itatañeite; iadedi jiaie cominina nainomo
itataite, naimie jitailla rafuena naimaci finua jira.

⁴⁴Jesús llote:

—Naie noficina dane ñaiticue. Noficimo bu
eicaitaia, bofedaitaie; ia naie nofici bumona ana uai,
naimiena saitaite. Ie isoide. Cue lluaña omoi
jamaia, duere sefuitomoi. Iena omoi ñinoñena, ja
muidomo faifitomoi.

⁴⁵Jesús lluaña naie judíuai illaicomini caca-
janona, naimiedi naimacina ñaiana jai uiñotimaci.

⁴⁶Icirillamona, naimiena gaitaacadimaci; iadedi
cominina jaciruitimaci, cominidi naimie Jusiñamui
facaina lloraimana raillanona.

22

Jesúdi illaima ie jito aina ua llua rafue

¹Jusiñamui jofomo Jesús nia illanona, nainomo
itinona llofueite:

²—Jusiñamui dibeimo comini jailla rafuena
omoi lloiticue. Iena omoi uiñollena, bie rafuedo
iena lloiticue. Illaimadi ie jito ai ua rafue finode.

³ Naimie ie mullaini orede, rafuemo llogano uaidollena; iadedi nai llogano biacaiñedimaci.
⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. Iiretaiai, farediretaiai diga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide.
⁶ Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaïma eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci. ⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaïma nainomo fecaca iniroina jítadimaci. ¹¹ Illaïma fo bia, mesamo itino jibuillena, dinomo daje ïima rafue ie mare iniroina jitañenana ciode. ¹² Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide. ¹³ Ie jira naie illaïma ie mullaïaïmo llote: “Naimie cuena ñnoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. ¹⁴ Ero, naie rafuemono omoi fueo. Illaïma ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicánua rafue

(Mr 12.13-17; Lc 20.20-26)

¹⁵ Naimacimo Jesús lua mei, fariseuai comini abido jaillanona, coniniri siadotimaci. Naimie raise uai oñedena, naimiena duere finollena, Jesúsna facaciacadimaci. ¹⁶ Ie jira naimie dine naimaci cominimona dajerie oredimaci. Herodianuai railla cominina jiaí jaidimaci. Jesús dine rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jicanoiacadicaí. Dani Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

¹⁸ Naimaci comeciaina marañedicinona facajana Jesús uñuamona, uai ote:

—¿Bue ñellena cuena facacitomoí? Maredinona abi caitadomoí. ¹⁹ Ucube cuemo acata —llote. Ie jira acatatimaci.

²⁰ Jesús dinena jicanote:

—¿Bu ie joreño nainomo ite? ¿Bumo jainaiaide bie cuega radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie llwana cacajano, rajjicaidimaci. Naimie jeare uai oñena jira, naimie dinomona oni jaidimaci.

*Jesús dñe saduceuai railla comini billa rafue
(Mr 12.18-27; Lc 20.27-40)*

²³ Naie facaise saduceuai railla comini naimie dñe bitimaci. Fiodaillamona jaca buna jilloñellena ñnotimaci. Jesúmo llotimaci:

²⁴ —Maestro, Moisés micori jaie cuega: “ñima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁵ Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruiainide jiai fiodailla. ²⁶ Naie siete digamiedemona iese sefuide. ²⁷ Ja muidomo naie riño jiai fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena ñniredede —llotimaci.

²⁹ Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi. ³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisai aínidimaci. Ininidimaci. Ie isoi iitimaci. ³¹ Fiodaitino jilluana omoimo lloiticue. Jusiñamui omoi jaiagaimo jaie llogacinona ñnoñedomoi. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dñe itimaci. Ico naimaci abiaina jiai jillotaite —llote. ³³ Nainomo ite comini iena cacajano, naimie llofuiari rajicaidimaci; ia saduceuai dñena uainicaidimaci.

*Jesús nanoca llogacinona llofuia rafue
(Mr 12.28-34)*

³⁴ Saduceuai comini uainicaillana fariseuai di jai fidiano, Jesús dine ofidimaci. ³⁵ Naimacimona damiedi Moisés micori jaie llogacinona eo uinote. Jesúsna facacillena, naimiemo jicanote:

³⁶ —Maestro, Moisés micori jaie llogacinuaimona, ¿nie llogacino ua nanoca llogacinona?

³⁷ Jesús dinena uai ote:

—Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. ⁴⁰ Bie mena llogacinomona nana jaie llogacinuai comuide. Nana Moisés micori llogacinuai naiemona comuide. Nana Jusiñamui facaina lloraini micoriai llogacinuai naiemona comuide —llote.

*Jesús dinena fariseuai cominimo jicanua rafue
(Mr 12.35-37; Lc 20.41-44)*

⁴¹ Naimie dine nia fariseuai comini ia, Jesús naimacimo llote:

⁴² —Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

—David micori jito. David micori isoi Cristo ie cominina sedaite.

⁴³ Jesús dinena jicanote:

—Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei ñine ana rai.

Ona ñinoñedino o anamo itataitue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

*Jesúdi judíuai illacomínina ñaia rafue
(Mr 12.38-40; Lc 11.37-54; 20.45-47)*

¹ Jusiñamui jofomo Jesús nia illanona, naimie ñine ailluena comini bitimaci. Ie llofueoicaigano nainomo jiai illanona, nana naimacimo llote:

² —Moisés micori llogacínuaína llofuerainidi naie rafuedo jai jaicabidimaci. Fariseuai comini iedo jiai jaicabidimaci. ³ Naimaci llofuiacínodo omoi jai. Naimaci llofuiana omoi cacarefi; iadedi naimaci illa isoi omoi iñeno, naimaci llofuiacínodo naimaci jaiñena jira. ⁴ Omoi einamací llogacínuaído raise omoi jaillena, ñiga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodimaci. Jiaie cominimo

ite Jusiñamuimo jürabe baifemo faitibena uiacacabidimaci. Iniroi fuedadi aillofena jonegana gaidimaci. ⁶ Rafue ia, naimaci jamai bue isoñedinomo comecina facajanona, rafue nama ecimo raiacadimaci. Ofiracomo uicomo raiacadimaci, comini naimaciri acarillena. ⁷ Nine naimaci jaia, nana comini naimacina uaiduana gaidimaci. Maestrodicinona uaiduana jiai gaidimaci. ⁸ Jusiñamuina eo raise naimaci sedajana omoi uñuana jitaidimaci. Naimaci isoi iñeno. Omoi damacina jira, omoimona damie omoi baifemo faiamo comecina facañeno. Naimiena maestrona raiñeno. Omoi baifemo cue illanona, omoi maestrodicue. ⁹ Omoi Moo Jusiñamui monamo illanona, dama naimiena seda. Jiaimiena sedañeno. Jusiñamui isoi jiaimiena “Moo” raiñeno. ¹⁰ Omoi damacina jira, omoimona damiena “Ca illaima” raiñeno. Omoi illaimana jai iticue. ¹¹ Omoimona bu imiena jaiacania, omoi mullaimana naimie nano jaillamona, omoina naimie canua. ¹² Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoñedimiena itataite.

¹³ Naie facaise Moisés micori llogacinona llofuerañidi fariseuai comini diga illanona, Jesús naimacimo llote:

—Jusiñamui omoina duere finoite. Mareuidinona abi caitadinodomo. Jusiñamui dibeymo comini illana jitaiñedomo. Naimie dibeymo omoi illana jiai jitaiñedomo. Ie muidona Jusiñamuimona duere sefuitomo. ¹⁴ “Jusiñamuina eo sedadimaci” omoimo comini comeaiina

facajana jitaïdomoï. Ie jira are j#domoï; iadedi iese iñedomoï. Maraiñede rafuena finocabidomoï. Jifuianona feciñuai rana bairocabidomoï. Ie jira Jusiñamui omoïna eo duere finoite. ¹⁵ Damiëna omoï ðibeimo itatallena, omoï isoi Jusiñamui rafuedo naimie jaïllena, ðiga rafuena finodomoï. Omoï ðibeimo illa mei, omoï baiñemo omoï einamacï llogacïnodo naimie jaïllana jitaïdomoï. Omoï ðiga ico naimie ua faifite. Cominina uanaïñeðicïnodo jaitatomoï. Iese omoï illa jira, duere sefuitomoï.

¹⁶ Omoï llofuiacino ðiga cominina canoñedomoï. Mareuïðinona abi caitaðinodomoï. Raicabitoï: “Cai lloga uai cai finollena jiaï cominï uïñoïllena, Jusiñamui jofomo ite oro mamecïna llinotïcai; iadedi Jusiñamui jofo mamecïna cai llinoia, cai lloga uaina cai finoñenia, caïmona mare. Jusiñamuïmona duere sefuiñeïtïcai” raicabitoï.

¹⁷ Abi uïñoñedomoï. Omoï llofuiacino ðiga cominina canoñedomoï. Jusiñamui jofomo naie oro jainaïaïlla jira, naie orodï mare; iadedi naie oro naie jofo baiñemo uaiñede. Abina omoï uïñoñena jira, Jusiñamui omoïna duere finoite.

¹⁸ Jiaï raitomoï: “Jusiñamuïmo faga toïca ocaina jobaïsoïllano mamecïna cai llinoia, cai lloga uaina cai finoñenia, caïmona mare; iadedi Jusiñamuïmo fecaca toïca ocaina mamecïna cai llinoia, cai lloga uaina jaca finoïtïcai”.

¹⁹ Abi uïñoñedomoï. Omoï llofuiacino ðiga cominina canoñedomoï. Naie jobaïsoïllanomo naie ocaina illa jira, naie ocaina mare; iadedi naie ocaina naie jobaïsoïllano baiñemo uaiñede. ²⁰ Ero, Jusiñamuïmo ocaina jobaïsoïllano mamecïna omoï llinoia, nainomo ite

ocaina mamecina jiaí llinotomoi. ²¹ Jusiñamui jofomamecina omoi linoia, Jusiñamui nainomo illajira, naimie mamecina jiaí llinotomoi. ²² Monamote ra mamecina omoi linoia, Jusiñamui illano nainomo illajira, nainomona cominina naimie sedaja jira, naimie mamecina jiaí llinotomoi. Omoi llua rafuena omoi finoñenia, Jusiñamui omoína duere finoite.

²³ 'Mareuidinona abi caitadinona omoi illamona, omoi mo nia lloiticue. Nana omoi illimo ite ramona, nana omoi mo ite ucubemona Jusiñamui mo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiaí finua. Iena omoi finoñenia, Jusiñamui omoína duere finoite. ²⁴ Abina uiñoñedomoi. Jallecima jiroracomo ia, iena oni faiga; ia ail-lue ra nainomo ia, iena cioñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoi mo nia lloiticue. Omoi einamací llogacínodo eo jaidomoi; iadedi omoi comeciaina raise finoñedomoi. Eo fiñdomoi. Jifuianona comini rana bairodomoi. Jeacinona finocana jaidomoi. ²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise

finoñedomoi. Nano omoi começina raise fino. Mare rafue finocana jai. Omoi einamaci rafuemo começina facañeno; ia Jusiñamui rafuemo começina faca. Iese omoi jaiñenia, Jusiñamui omoina duere finoite.

²⁷ Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede. ²⁸ Ie isoidomoi. Marena eruaidomoi; iadedi maredinona abi eo caitadomoi. Omoi começiai eo maraiñede. Omoi começina raise omoi finoñenia, Jusiñamui omoina duere finoite.

²⁹ Omoimo nia lloiticue. Naimacimo birui omoi começaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, ³⁰ raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí” raitomoi; ³¹ iadedi omoi llumona Jusiñamui facaina lloraini micoriai meinetino uruaí omoina uiñoticaí. ³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³ Omoi maraiñena jira, jaio nairai isoidomoi. Ja muidomo iraimona jillobiñeitomoi. Nainomo duere sefuitomoi. ³⁴ Cue rafuena lloiena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraíni omoi dine jiai oretaiticue. Dajeriena meinetomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. ³⁵ Abel micori jaie ite. Naimie maremie. Ie ama naimiena meinete.

Naimie facaisemona omoi jaiagai ailluena mare cominina meinetimaci. Ie mei omoi jaiagai Zacariana meinetimaci. Naimiedi Berequias jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci.
³⁶ Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi marañede rafuena finocana jaidomoi. Jusiñamui omoina duere finoite.

*Jesús Jerusalémo itinomo llua rafue
 (Lc 13.34-35)*

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruias sedaja isoi, diga icaiño cue anamo omoina uaidoiacadie; iadedi omoi dinena cuena jitaiñedomoi. ³⁸ Iemona Jusiñamuidi omoi illanona jai fañonocade.
³⁹ Cue Moo dine jaiticue. Cue jailla mei, cuena cioiñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofu judaiana llua rafue

(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúsna nai jofona eruaitatimaci. ² Jesús dinena llote:

—Bie jofona ciódomoi. Uanaicinona omoimo lloiticue. Nana bie jofomo ite noficiái ico judaisite —llote. ³ Ie mei Olivos railla anedo dine rillanona, Jesús naie muidomo raídemo, ie llofueoicaigano naimiemo iena anado llotimaci:

—Jusiñamui jofo judaiana omo jicanoiacadicaí. ¿Ñiruido iena suite? Caímo llono. O abído billirui iaírei ia, ¿nie isoide rafue suite, o abído billiruina caí uñollena?

⁴ Uai ote:

—Omoína bie rafuena bu jífueñellena, omoí abína rairui. ⁵ Ailluena comini cue mamecido billanona: “Cristodicue” raitimaci. Díga cominina jífueitimaci. Iemona omoí abína rairui. ⁶ Jobaimiaí illena fíditomoi; iadedí jacíruiñeno. Iese suite; iadedí abído nia biñeíticue. ⁷ Daje nairai jiaíe nairai díga jobairitimaci. Daje gobierno díga jiaíe gobierno díga jobairite. Díga illanuaimo comini aime guitimaci. Díga illanuaimo ñuisañuai suite. ⁸ Iese suia, omoí duere sefuillífue omoimo suite.

⁹ 'Cuena iñoñedino omoína gaitatajanona, omoína meineítimaci. Cue cominina omoí illamona, nana nairaiái omoína enoítimaci. ¹⁰ Naie facaise cue díbeimo itinomona ailluena abído danomo jaitimaci. Iemona duere omoí sefuillena, omoína janoñeítimaci; iadedí omoína enoillamona, omoína llogídoítimaci. ¹¹ Naie facaise díga comini raitimaci: “Jusiñamui facaina llorainídicaí”; iadedí Jusiñamui facaina llorainiñedimaci. Uanaicinona lloñeítimaci. Díga comini naimaci díbeimo itataítimaci. ¹² Jeacino eo comuicana jailla jira, ailluena comini conini isiruiñeítimaci; ¹³ iadedí cuena fañonocaiñedimie ja muidomo monamo jaca iite. Naimiena

jillotaiticue. ¹⁴ Diga cominidi Jusiñamui dibeimo comini ille rafuena nana nairaimo lloitimaci, nana nairaiiai iena cacaillena. Ie mei abido biiticue.

¹⁵ 'Cue lluamo cacarei. Daniel micori Jusiñamui facaina lloraima. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. ¹⁷ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁸ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁹ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. ²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaise mona iese comini nia duere sefuiñeditimaci. Ico iese eo duere sefuiñeitimaci. ²² Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ 'Ie facaise omoimo bu raia: "Jadi, Jusiñamui facaina lloraima benomo birui bairede. Naimiedi Cristo", iena ñnoñeno. Jiaimie raia: "Oni batine Cristo birui bairede", iena ñnoñeno. ²⁴ Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena

finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena iñoño. ²⁷ Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena uiñoitimaci. ²⁸ Urujaisai rifaide ramo ofillana uiñua isoi, nana cuena iñotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Ieconi nana nairaijai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedalena, illaimana biiticue. ³¹ Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² 'Higuera railla riaramona omoi fueo. Bie eniruemo naie riara firuillamona, fiemona raire illana uiñotomoi. ³³ Ie isoide. Bie rafue ico suia, cue billirui iairei illena uiñoitomoi. ³⁴ Uanaicinona omoimo lloiticue. Nana bie rafue suille facaiseconi bie nairai nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue.

Dama cue Moo iena uĩnote. ³⁷ Abido cue billirui iairei ia, Noé micori facaiseconi itino isoí comini iitimaci. Naimaci duere sefeuillemo Noé micori facaise itinodi comeciaina facañedimaci. ³⁸ Naie facaiseconi nia eo noci deiñenia. Noé micori ecimo itino naimaci isoilla isoí icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconi menamie illimo danomo iitíiaimaiai. Damie Jusiñamui dine jaite. Jiaimie fiebillanona, Jusiñamuimona duere sefuite. ⁴¹ Mena riño danomo doberitíiaíñuai. Dañaiño Jusiñamui dine jaite. Jaiñaiño fiebillanona, Jusiñamuimona duere sefuite. ⁴² Cue billirui omoí uĩñoñena jira, iemo ocuiri. ⁴³ Bie rafuemo omoí comeciaina omoí faca. Jofo namadi firiraima nie naiona billena uĩnotena, ie rana faifiñellena, ie jofona raise sedade. ⁴⁴ Ie isoí cue billemo ocuiri. Monamona ico abido biiticue. Omoí ocuiriñena facaisemo riiticue. Ie jira cue billemo nagarui ocuiri.

Jesúdi patrón ie mullaímana ie jofona sedataja llua rafue

(Lc 12.41-48)

⁴⁵ Jesús llote:

—Cue billena omoí raise cacaillena, jiaie rafuedo iena lloiticue. Patrón daje mullaímana ie jofona sedatate. Naie mullaíma ñnogamie. Abina uĩnotimie. Nainomo itinona raise ecacabide.

Naie mullaïmana ie jofona sedataja mei, naie patrón oni jaide. ⁴⁶ Patrón ico abido bia, ie jofona ie mullaïma raise sedaia, mullaïmari naimie iobillamona, ie mullaïma marena iite. ⁴⁷ Iobillamona, patrón ie mullaïmana nana ie raruiaina sedatataite; ⁴⁸ iadedi ie mullaïma maraiñenia, ie comecina facaite: “Cue patrón are biñeite. Naimie lloga uaina finoñeiticue”. ⁴⁹ Ie comecina iese facaja jira, naimie anamo ite mullaïaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁵⁰ Ie ocuriñena facaise ie patrón abido billanona, naimiëna duere finoite. ⁵¹ Ie isoide. Cue abido bia, cuena ñnotinori iobiticue; ia cuena ñnotinona abi caitadino ñne cuena ñnoñedinona dotaiticue. Nainomo duere sefuillano eetitmaci.

25

Jesúdi diez jitaiñuaina llua rafue

¹ Jesús llote:

—Abido cue bia, Jusiñamui ie cominina sedaite. Cue billemo ocuritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuai lamparíniai llinuanona, ñima ie aina ua meinomo finoca rafuemo jaiacadimaci. ²⁻⁴ Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedinomaci. ⁵ Ima diga ie rafue ñne jaillemo ocuridimaci. Ima are biñena jira, inidimaci. ⁶ Daje ñberuise damie ado llua na cacadimaci.

Llote: “Jadi, naie iimadi jai bite. Mai bi, naimie uicomo naimiemo cai dafai fillesa”. ⁷ Casillanona, naie jitaiñuai lamparíniai unedimaci. ⁸ Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lamparíniai boacaiñedesa”. ⁹ Uai otimaci: “Fecaacaiñedicaí. Omoimo cai fecaiadedi, caimo baiñeite. Omoi jitaia, chinganomo ibajai”. ¹⁰ Naiñaiñuai ibajailla mei, naie iima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie iima ibaide. ¹¹ Ie mei naie farena ibajaidiñaiñuai abido billano, raitimaci: “Nase econo”. ¹² Naie iima uai ote: “Uanaicinona omoimo lloiticue. Omoína uiñoñedicue. Econoñeiticue”. ¹³ Ie isoide. Cue billiruina omoi uiñoñena jira, nagarui cuemo omoi ocuri.

Jesúdi patrón ie mullaiaimo ucubena fecaja llua rafue

¹⁴ Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade. ¹⁵ Damiemo cinco diga ucubena fecade. Jiaimiemo menacubena fecade. Jiaimiemo dacubena fecade. Nagamie ie maijille dinori fecade. Ie mei oni jaide. ¹⁶ Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote. ¹⁷ Menacubena feiñotimie iena fecallena, rana ibade. Iemona jiaie menacubena ote. ¹⁸ Daucubena feiñotimie eniruemo naie ucube eenote. Iena fecallena,

rana ibañede. Iemona buena oñede. ¹⁹ Digarui illanona, naie patrón abido bite. Naimaci cuentas siadollena, ie mullaiaina uaidote. ²⁰ Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”. ²¹ Patrón uai ote: “Raise marena maijidio. Eo mare mullaïmadio. Janore ucube o raise sedaja jira, ona ailluena rana sedataiticue. Cue diga caïmare jaca iitio”. ²² Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”. ²³ Naimie patrón uai ote: “Raise marena maijidio. Eo mare mullaïmadio. Janore ucube o raise sedaja jira, ona ailluena rana sedataiticue. Cue diga caïmare jaca iitio”. ²⁴ Daucubena feiñotimie bite. Raite: “Patrón, o riirenana uiñoticue. O mullaiai maijiamona ganacabidïo. ²⁵ Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jadi, iena jai abido atidicue”. ²⁶ Patrón uai ote: “Maraiñedio. Rairaiedio. Cue mullaiai maijiamona cue ucube uana uiñotio. ²⁷ Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”. ²⁸⁻³⁰ Ie mullaiaimo llote: “Naimiemona ie ucubena bairo. Diez ucube illamiemo iena feca. Bie maraiñede mullaïma jïtiredinomo cuemona oni dota. Nainomo comini duere sefuillanona eetimaci”. Jusiñamui ie jitailla rafuena finodinona: “Mare” raite; iadedi ie jitailla rafuena finoñedinona duere finoite. Jusiñamui omoïna duere finoñellena, cue abido billirui omoï uiñoñena jira, Jusiñamui jitaillacinona finocana

omoi jai.

Jesúdi cominina duere finolle llua rafue

³¹ Jesús llote:

—Omoína nia llofueitícue. Abido cue bia, nana cue jaienisai díga biitícue. Illaimana íco cue bia, illaima illa ífomo íitícue. Eo síño uaido biitícue. ³² Cue uicomo nana nairaiái ofitímaci. Toica llaudaíái sedaraima íe chivos motomona íe llaudaíái oni fetua ísoi, naimacína fetoitícue. ³³ Cue jitaillacínona finodíno díese cue fetuanona, cue nabeimo itataitícue. Cue jitaillacínona finoñedíno díese cue fetuanona, cue jarifebeimo itataitícue. ³⁴ Cue illaimana jira, cue nabeimo ítinomo lloitícue: “Cue Moo omoírí íobillanona, omoína jai caímare ítatate. Cue Moo cominina omoi ílla jira, cue sedajanomo mai bí. Nainomo duidomoi. ³⁵ Cue jitaillacínona omoi finuamona navuí aimetaitícuemo, cuena ecadomoi. Jiroacadícuemo, jinuí cuemo fecadomoi. Omoi nairai díne cue macaria, cuena omoi uíñoñoeno omoi íofomo cuena feiñotomoi. ³⁶ Íniroinidícuemo, íniroi cuemo fecadomoi. Duidícuemo, cuena canollena, cuena jíbuisaíbidomoi. Cárcelmo íticuemo, cuena canollena, cuena jíbuisaíbidomoi”. ³⁷ Cue jitaillacínona finodíno dínená cuemo jícanoítímaci: “Nama, ¿níruido aimetaitíomo, ona ecadícai? ¿Níruido jiroacadíomo, jinuí omo fecadícai? ³⁸ ¿Níruido ona cíodícai, caí íofomo ona feiñollena? ¿Níruido íniroína omo fecadícai? ³⁹ ¿Níruido duidíomo, ona jíbuisaidícai? ¿Níruido cárcelmo ítíomo, ona jíbuisaidícai?” ⁴⁰ Uai oitícue: “Uanaicínona omoímo lloitícue.

Cuena ñnotinomona jamai bue isoidimiena canodomoimo, cuena jiai canodomoï” lloiticue.

⁴¹ 'Iemei cue jarifebeimo itinomo lloiticue: “Cuemona oni mai jai. Cue cominiñedomoï. Jai faifidomoï. Duere omoï sefuillena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiai jai finode.

⁴² Cue jitaillacinona omoï finoñenamona, navui aimetaiticue, cuena ecañedomoï. Jiroacadicuemo, jinui cuemo fecañedomoï. ⁴³ Omoï nairai dine cue macaria, omoï jofomo cuena feiñoñedomoï. Iniroinidicuemo, iniroi cuemo fecañedomoï. Duidicuemo, cuena canollena, cuena jibuisaibiñedomoï. Cárcelmo iticuemo, cue canollena, cuena jibuisaibiñedomoï”.

⁴⁴ Cuemo jicanoitimaci: “¿Niruido aimetaitiomo, ona ecañedicai? ¿Niruido jiroacadiomo, jinui omo fecañedicai? ¿Niruido ona ciodicai, cai jofomo ona feiñollena? ¿Niruido iniroinidiamo, omo fecañedicai? ¿Niruido duidiomo, ona jibuisaiñedicai? ¿Niruido cárcelmo itiomo, ona jibuisaiñedicai?”

⁴⁵ Uai oiticue: “Uanaicinona omoimo lloiticue. Diga comini cuena ñnotimaci. Naimacimona jamai bue isoidimiena omoï canoñena jira, cuena canoñedomoï” lloiticue.

⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

26

*Judíuiai illaicomini Jesúna gaitallena siadua rafue
(Mr 14.1-2; Lc 22.1-2; Jn 11.45-53)*

¹ Ie llofueoicaiganona llofuia mei, naimacimo Jesús llote:

² —Pascua railla rafue illena, menarui fiebide. Iena uiñotomoi. Monamona jaie cue billamona, imana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote. ³ Naie facaiseconi Jusiñamui diga nanoca ñairainidi, jaie illaicomini diga, nanoca ñairaima jofomo ofidimaci Nanoca ñairaimadi Caifás. ⁴ Jesúsna jifuiano gaitallena coniniri siadotimaci. Naimiena meinellena jai siadotimaci. ⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuititimaci. Nia sedaiticai.

*Jesúmo riño caimare soride ra totaja rafue
(Mr 14.3-9; Jn 12.1-8)*

⁶ Betania railla nairaimo Jesús jaillanona, Simón jofomo jaide. Simódi jaie efonaitimie. ⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uiñua jira, naimacimo llote:

—¿Bue ñellena naiñaiñona jeare ñaitomoi? Mare rafuena cuemo finode. ¹¹ Omoi diga dueredino jaca itimaci; iadedi omoi diga iñeiticue.

¹² Cue abimo bie caimare soride ra naiñaiño to-tajamona, cue fiodaillirui facaina naiñaiño iese finode. ¹³ Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue

(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúsna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. ¹⁶ Naie facaiseconimona Jesúsna gaitatalliruimo naimie ocuiride.

Jesúdi ie fiodaille rafuena llua rafue

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaidio?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iairei ite. O jofomo ie llofueoicaigano diga pascua rafuena finoacade” llono.

19 Ie muidona ie llofueoicaiganodi ie lluana finodimaci. Pascua railla rafue guille finodimaci. 20 Nairui jitoma ana itemo, Jesús ie doce llofueoicaigano diga nainomo guisaide. 21 Naimaci mesamo guitimacimo, Jesús llote:

—Omoimona damie cuena gaitataite —llote.

22 Iena cacajanona, eo sunaitimaci. Damierie naimiemo jicanoside:

—¿Cuena ñaitio?

23 Uai ote:

—Omoimona damie bie platomo cue diga llomenico diga mutade. 24 Jusiñamui facaina lloraima cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

25 Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

26 Naimaci nia guitimacimo, llomeniconona Jesús llinuana, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

27 Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro. 28 Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi

omoimo jiaie rafue birui itatajanona, omoï jeacino oni dotajana jai llote. Bie vinodi naie rafue facai ie. Cue llua isoi bie vinona omoï jiruamona, cue fiodaillamo omoï comeci. ²⁹ Omoïna bene dane iese caimare nabaiñeiticue. Cue Moo sedajanomo omoï diga cue ia, nainomo omoïna dane iese caimare marena nabaiticue. —Iena jirodimaci.

*Jesúdi Pedro naimiëna januaana llua rafue
(Mr 14.26-31; Lc 22.31-34; Jn 13.36-38)*

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci.

³¹ Jesús naimacimo llote:

—Cuemo suille rafue muidona, ja naio cuena faïnonocaitomoi. Jusiñamui facaina lloraima micori iena jaie cueda: “Toica llaudaiaï sedaraimana meinetaicue. Naimie toinaï uaficaïda jaitimaci” cueda. Naimie micori caina cuete. ³² Ero, fiodaillamona cue jillua mei, omoï uicodo Galileamo jaiticue, nainomo omoï diga dafaïfillena.

³³ Pedro uai ote:

—O finolle rafue muidona nana jiaïno ona faïnonocaïa, ona jaca faïnonocaiñeiticue.

³⁴ Jesús ñinena raite:

—Uanai omo lloiticue. Ja naio itava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaïadedi, ona janoñeiticue.

Nana ie llofueoïcaïgano daje uaido jiaï raitimaci.

*Jesúdi Getsemanímo Jusiñamuimo jia rafue
(Mr 14.32-42; Lc 22.39-46)*

³⁶ Oni jaïllanona, Getsemaní railla illanomo jaidimaci. Ie llofueoïcaïganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaimaiaina jiai uite. Naimie sunaicaide. Ie comeci uri iñede.

³⁸ Naimacimo llote:

—Cue comeci sunaicaide. Niadi fiodaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jii de:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jii de. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo. ⁴¹ Iniñeno. Taife ramo omoina fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoina naimie ocuiñotallena —llote. ⁴² Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride. ⁴⁴ Abido jaillanona dane jii de. Ailli daje isoiduaido jii de. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fiodaiticue. Cuena ja gaitajanona, Jusiñamui jitailla

jira, naimiena ñinoñedino anamo ja iiticue. ⁴⁶ A naidacai. Maiña. Cue gaitataitimie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. ⁴⁸ Jesús dine naimaci nia riñenia, Judas micori naimie diga bitinomo jai llote:

—Jesúna omoi uñollena, naimiena llibanoitícue. Ie mei naimiena gaita —llote. ⁴⁹ Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai bitícue. —Ieconi naimiena llibanote. ⁵⁰ Jesús dinena raite:

—¿Bue ñiaibitio?

Ie mei Judas micori diga bitinodi Jesúna gaitadimaci. ⁵¹ Iena cianona, Jesús diga itinomona damie ie lloebi llinuanona, Jusiñamui diga nanoca ñairaima ie mullaïma jefona jaïbonote. ⁵² Jesús naimiemo llote:

—O fuiriacania, o jiai fiodaitio. O lloebi dane eeno. Cue riiduanona, fuiriñeno. ⁵³ Cuenariidollena, cue Moomo cue jicaia, eo ailluena jaïenisai cue dine naimie oretaite; ⁵⁴ iadedi iese cuena ridoia, Jusiñamui facaina lloraini micoriai ciegafuiai suiñeite. Cue fiodaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fñiraimadicueta cuena

omoi gaitajai**ibilla**. Jusiñamui jofomo nagarui llofuecabiticue; iadedi cuena gaitañedomoi.
⁵⁶ Nana bie rafue suide, Jusiñamui facaina lloraini micoriai ciegafuiai suillena —llote. Ie facaise nana naimie llofueoicaigano naimiena fainonocaillano, aisidimaci.

Jesúdi judúuai illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamací jiaí ofidimaci. ⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uiñoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiaí. ⁶¹ Raitiaimaiaí:

—Bimie llote: “Jusiñamui jofona judaíredicue. Judaia mei, darui amani illanona, iena dane finoredicue” —llotiaimaiaí.

⁶² Jusiñamui diga nanoca ñairaima Jesúmo jicanote:

—¿Niese iaímaiaí uai oitio? ¿Nie isoide rafue ona llogidotiaimaiaí?

⁶³ Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite.

Uanaic̄inona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, imana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaiñedicaí. Ie ñaiamona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fiódaillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci.

⁶⁸ Raitimaci:

—O Cristodiodena, ¿bu o bucoia? caimo llono.

Jesús uai oñede.

Pedro di Jesús a janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairairirimo ite. Naie jofo nama mullaíño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie mullaíño cianona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O llogamiēna uiñoñedicue.

⁷³ Dallu illanona, nainomo itino Pedro dine bil-lano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúsna uiñoñedicue. —Ieconí itava ñaite.

⁷⁵ Iena cacajano, Pedro Jesús lluana uibiñote. Jaive Jesús Pedromo llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamací diga, Jesúsna siadotimaci. Naimiēna meinellena siadotimaci. ² Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fodaila rafue

³ Judas micori Jesúsna jai gaitatate. Naie illacomini Jesúsna meiniana lluana naimie micoridi uiñuamona, ie comeci iuaina meidote. Illacominimo ie treinta diga ucubena abido atide.

⁴ Raite:

—Jesús maraiñede rafuena jaca finoñede. Naimie fiodaiñeite. Naimiena cue gaitatajamona, maraiñedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofu jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona. ⁶⁻⁷ Jusiñamui diga nanoca ñairaini naie ucubena iraiia mei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaímona bu bia, naimie fiodaia, naie eniruemo naimiena raíllena, iena ibadimaci. ⁸ Naie ucube muidona damie fiodailla jira, birui naie enirue mamecidi dirue ie enirue. ⁹ Iemona Jeremías micori jaie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. ¹⁰ Naie ucube diga jiñora ocabilla eniruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúna atia mei, Pilato Jesúmo jicanote:

—¿Judúuai comini illaimadio?

Jesús uai ote:

—Jii. Raise llotio.

¹² Ie mei Jusiñamui diga nanoca ñairainidi, einamací diga, naimiena llogidote; iadedi naimie dinena uai oñede. Ie abina riidoñede. ¹³ Ie muidona Pilato naimiemo llote:

—Diga rafuena ona llogidotimaci. ¿Ñiese uai oñedio?

¹⁴ Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itinomona Pilatodi comini jicacamiena jamai jino orede. ¹⁶ Bie año cárcelmo Barrabás raillamie ite. Naimie mameci eo are soride. ¹⁷ Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredo.

¹⁸ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meineiacanana jiai uiñote. ¹⁹ Ie maijiracomo naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñeno. Jaive naio cue ñicairillano, naimie muidona cue comeci jarire ite”. ²⁰ Ailluena comini Pilato dine ofillanona, Jusiñamui diga nanoca ñairainidi, einamací diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llotimaci. ²¹ Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

²² Pilato dinena jicanote:

—¿Niese Jesúna cue finuana jitaidomoi?
Naimiedi Cristona jiai mameciredede.

Nana uai otimaci:

—Naimiena cruzmo corai.

²³ Pilato dane jicanote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiena corai.

²⁴ Jesúna jino oretajana jitaiñedimaci. Iena Pilato uñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiai cai uruiaí muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede. ²⁷ Dajerie soldaduai di Pilato jofomo Jesúna uite. Nana soldaduai nainomo ofidimaci. ²⁸ Naimie iniroi duiñuano, naimiemo jiduirede iniroina jitadimaci. ²⁹ Eecuaímona niga nuiciraina naimie ifogimo jitadimaci. Ie nabeillimo radosina jonete, illaímana naimie illa isoi. Caiñici ifodo raidimaci, illaímana naimie illa isoi. Raitimaci:

—Jadi, judíuai illaíma. —Iese raillanona naimiena jifanododimaci. ³⁰ Naimiena tuallaítimaci. Naimie onollimo ite radosina

naimaci llinocaida, naiedo naimie ifogina buta-butadimaci. ³¹ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraia rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafaifidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raillanomo jaidimaci. Ifocoraina eruailla jira, iese mamecirede. ³⁴ Nainomo rillanona, ie abi isirena cacaiñellena, vinomo erirede rana faianona, naimiemo fecadimaci; iadedi iena naimie facajano, iena jiroñede. ³⁵ Naimie coraia mei, cruzna naidania mei, naie soldaduai naimie iniroi daní coninimo fecasite. Naie iniroi bu uille raillanona uiñollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogi afebeimo ie llogiduafuena jonetimaci. Iese cuela: “Bimiedi Jesús. Judíuai comini illaíma”. ³⁸ Ie mei mena firiruide iaímaiaína coraidimaci. Damie Jesús nabeimo coraica. Jiaimie Jesús jarifebeimo coraica. ³⁹ Naisodo jamai jaidino Jesúna mameritimaci. Mamerillamona, ifogiaina jaididimaci. ⁴⁰ Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micorí llogacino

llofueraini naimiena jiai mameritimaci. Einamac
naimiena jiai mameritimaci. Raitimaci:

⁴² —Jiaie cominina jillotate; iadedi dama
naimie abina jilloitanide. Naimiedi cai judíuai
comini illaíma raillamiedena, cruzmona naimie
ana niade billasa. Ie mei naimiena ñnoitícai.

⁴³ “Jusiñamui Jitodicue” naimie railla jira,
naimiedi Jusiñamuina ja ñnotena, Jusiñamui jitaia,
Jusiñamui naimiena jillotaite. —Iese naimiena
mameritimaci. ⁴⁴ Naimie diga coraíca iaímaiaí
daje isoi naimiena mameritiaímaiaí.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas
mona jitibicaide. ⁴⁶ Ie meinomo judíuai railla
uaido Jesús ado jidaioide:

—Elí, Elí, ¿lama, sabactani? —jidaioide. Iena
oni dobaiñuamona raite: “Cue Jusiñamui, cue
Jusiñamui, ¿bue ñellena cuena faínonocaidio?”
raite.

⁴⁷ Iena cacajano, nainomo jamai itinomona
damierie raitimaci:

—Naimie jaie Jusiñamui facaina lloaíma Elíana
uaidote —raitimaci. ⁴⁸ Naimacimona damie jarire
jaillanona, fibecode ramo vinona faite. Radosimo
jillillano jirollena, naimiemo a fecade. ⁴⁹ Ieconí
jiaíno raitimaci:

—Ína nai. Dally seda. Elías naimiena jil-
loitajaíbillena sedaitícai.

⁵⁰ Ieconí Jesús dane ado cuirioita, fiodaite.

⁵¹ Naie facaise Jusiñamui jofomo ie fetaca
iníroife ana anaba jillacimo metodo menafe
cuararide. Ieconí ñuisaño suide. Iemona nofie

oni bojode. ⁵² Diga raiafuai econote. Jesús jillua mei, raiafomona, fiodaillamona, ailluena Jusiñamuina ñnotinodi jillodimaci. ⁵³ Ie mei Jerusalémo naimaci jaillanona, diga comini naimacina ciodimaci. ⁵⁴ Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinaillamona, naimie raite:

—Uanai bimiedi Jusiñamui Jito.

⁵⁵ Ailluena riñoniai naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruiai ei jiai ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús dibeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José uanona, jeanide mare userede ñiroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatiiañuai.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci.

⁶³ Raitimaci:

—Ero, naie abi caitadimie nia fiodaiñenia, navui llote: “Cue fodaillamona, darui amani illanona, jilloiticue”. ⁶⁴ Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi ari oi raillano. Naimie abina naimaci fianona lloitimaci: “Naimie jai jillode”. Iese sua, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaina nainomo fainonocaidimaci.

28

Jesús fodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jiaie María diga, raiafona jibuisaidiañuai.

² Ieconí ñuisaño suide. Monamona billanona, Jusifiamui jaienici raiafomo ibaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinaillamona, abi docaidimaci. Iemona fiodaitino isoi dallu itimaci. ⁵ Ie facaise naie jaienicidi dinena naie riño iañuaimo llote:

—Jaciruiñeno. Coraica Jesúna omuiño jenuana uifnoticue. ⁶ Naimie bene iñede. Naimie llua isoi, fodaillamona naimie jai jillode. Naimie ifo jeraimo billano mai jibuisaibi. ⁷ Ie mei

ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoi uicomo naimie jaite” llono. Bie rafue omuiño jai lloticue —llote. ⁸ Ie jira raiafomona rajicaillanona, eo iobillanona, raire jaidiaiañuai. Ie llofueoicaigano dine aisidiaiañuai. ⁹ Ie llofueoicaigano dine iaiañuai nia riñenia, Jesús iaiañuai mo dafaifillano, raite:

—Itomuiño. —Naimie dine iaiañuai rillanona, naimiena sedallena, naimie eillina llinotiaiañuai.

¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiaiañuai mo, nainomo ite soldaduaïmona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena.

¹² Iena cacajano, einamacï diga iena siadotimaci. Ie mei naie soldaduaïmo ucubena fecadimaci.

¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono.

¹⁴ Iena cai gobernador fidiia, naimie diga ñaiticai, omoina naimie duere finoñellena —raitimaci.

¹⁵ Ie jira naie ucubena feiñuanona, cominimo illaicomini lua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iracaiño lloga rafue (Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci.

¹⁷ Naimiena naimaci ciuanona, naimiena

sedadimaci; iadedi dajerie Jesús jilluana raise nia inoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza. ²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto,
Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 3 Mar 2023 from source files
dated 29 Jan 2022

145a1f66-dca1-5de3-9c00-4e533605e488